

Maaruku

Yaahaya Namoosa ontthenkeza Tarikhi

¹ Omwanzo wa hapari zooshapweya za Yinsa Al-Masiihu, Mwaana wa Nluku. ² Yaatikhiwa khwa ohupiri wa napiyu Ezaaya yoori: “Moone, kinlawe kamperekhe omaasho wawo karumeya aka, yoori atthenkeze tarikhi yawo; ³ huula enkhuwa enyakulaka n'yaara yoori: ‘Mwitthenkeze tarikhi ya Mbwana na mookolele miphiitelo zawe. ⁴ Aapuwiye Yaahaya namoosa n'yaara, khusala atafusiri monkoni wa woosiwa na othupwiya khwa nswammaha wa twampi. ⁵ Athu ooshi a nti wa Yudeya na apale a Yeruzaleemu aari ovira ataaka na otukhuru twampi zaya na yo aari wiiya a woosiwa khwa ye mmuttho Yorotaani. ⁶ Kuwo aari owalaazo Yaahaya zaari za shapala za enkamiiya. Ye aarina nzako awe wa shapala na aari ojaka mapalaka na asali ya ntthuttu.

Yaahaya onlawela oshaahiti wa Yinsa

⁷ Atafusiraka aari ori: “Paata ya miiyo onta otule ariina oowahi zayita miiyo, oto akinsuhi ofukula mikhoyi za jampali zawe. ⁸ Miiyo kiniwoosani na maati, ila ye onttela owoosani na Rooho Ttakatthiifu.

Woosiwa na ozayiniwa wa Yinsa

⁹ Wakathi otthuupule, khuta Yinsa wa Nazareeti ya Kalileya khoosiwa ti Yaahaya mmuttho wa Yorotaani. ¹⁰ Nasaapiru, eettaka ovuuwa

mmaati, khoona pinku efukuwiye na Rooho Ttakatthiifu yeettaka omwiishukhela nkhamajiwa. ¹¹ Aphano khuta huula pinkuuni elupaka yoori: “Weeyo o mwanaka wa wuupheta, na wookituvela channu.” ¹² Nasaapiru, Rooho Ttakatthiifu khunthuula khunlawana n'yaara. ¹³ Nttumpho eekhaliyeemo siikhu arupayiini, eettaka ozayiniwa ti Epiliisi. Ye aari vakatthi wa nyama za ntthuttu, ila malayikha aari ovira anrumeyelaka Yinsa.

Yinsa onrutela Kalileya

¹⁴ Paata ya Yaahaya ofukeliwa, Yinsa khulankha khusala alawa Kalileya, alaleyaka hapari zooshapweya za Nluku, ¹⁵ alupaka yoori: “Wakathi wafiya, na ofwalume wa Nluku ori kharipu; mwithupwiye na mwikhupali hapari zooshapweya.”

Othawuliwa wa Maaswihaapa

¹⁶ Eettaka olawa alottaka shiini ya ntthatta la Kalileya, khuwoona attwi awiri Simawu na Antere, eeselelaka matthavi aya mpahari, mwaasa yoori aari anamajiya. ¹⁷ Yinsa khuwooza yoori: “Mwikilotte, kinta wuurettani wiiya anamajiya a atthu.” ¹⁸ Aphano nasaapiru khulikha matthavi aya khusala anlotta. ¹⁹ Eettaka olawa etthiipile, khumoonu Yaakhumpa, mwaana wa Zepeteewu na twiye Yaahaya ari mmwaatiya alazelaka matthavi aya. ²⁰ Khuwaakhuwela, nasaapiru khulikha papaaya mmwaatiya vamote na anakhaazi awe khusala anlotta Yinsa.

Yinsa onimwiikara sheethwani

²¹ Paata ya toole, khulawa Kafwaranaawu. Noofiya saapatu khulawa osomisa nsinakooka. ²² Khusala awaatuvela masomi awe, maana aari owaasomisa nkhamana ntthu wawiiyana ofwalume na woohiyyi nkhamana anamanozela a kano. ²³ Aphano khuta nsinakooka mphule nlume aashinttiweeyo ti sheethwani. Ye khusala akhuwa araka: ²⁴ “Onnitakhelani fweeyo, Yinsa wa Nazareeti? Wata yoori onitapanye? Kajuwa yoori weeyo o Ttakatthiifu wa Nluku!” ²⁵ Ila Yinsa khunmaruwela araka: “Onyamale, oleemo mmwiili wa mwinyi otu!” ²⁶ Aphano sheethwani khuntatha ntthu otule woohusutivo khusaruwa mmwiili mwawe eettaka onyakula. ²⁷ Atthu ooshi khwiiya ooshanka mpakha khufiyelela wuuzelana atthaaporu yoori: “Niini epi zaya? Masomi mapheya antanaaye ofwalume! Mpakha onruma masheethwani yo khunshututela!” ²⁸ Hapari epile monkoni wa ye khumwazeyela nasaapiru nti wooshi wa Kalileya.

Owahi wa Yinsa vakatthi wa masheethwani na marati

²⁹ Wakathi aliiyeemo nsinakooka, khulawa na Yaakhumpa na Yaahaya owawe Simawu na Antere. ³⁰ Nkhewe Simawu eettiye orapalela voolili, yaari onlwaaza hooma, nasaapiru khuuziwa Yinsa. ³¹ Aphano ye khumwaattama, khunkhola nkhamana khunlansa, nasaapiru hooma khumwiisha, khwaaza owaarumeyela. ³² Weettelaka oripa, paata ya otupweela njuwa, atthu khuwaathuula alwele ooshi na anamasheethwani khumweettisela Yinsa.

³³ Atthu ooshi a nsitati mphule khukusanyeya vanlako wa nyuupa ethiitile, ³⁴ ye khuwaavonisa awaatta aari ohoochiwaaye pi marati a wakhula nanna. Theenya khwiikara masheethwani awaatta. Ye khaari olikha masheethwani apale ottakhula, maana yo aari onjuwa paani Yinsa.

Yinsa onlomba puuro yawiitthaaleyavo

³⁵ Supuyeene, nalelo ohinache saana, Yinsa khulankha khusaruwa khulawa puuro yawiitthaaleyavo ohali aari olompaawo. ³⁶ Simawu na ashirikhaawe khulawa omweekesa. ³⁷ Nonsikana, khumuuzo yoori: “Atthu ooshi antta oweekesa weeyo!” ³⁸ Yinsa khuwaajipu yoori: “Nlaweni ohali okinoko, miti naattamananiyeeyo, yoori kilawe kalaleye, maana tithiito miyo kiteeliyeeyo.” ³⁹ Aphano ye khweettetta Kalileya yooshi eettaka otafusiri nsinakooka na wiikara masheethwani. ⁴⁰ Namaharaja mmote khumwaattama na khunkokhorela khunvekela yoori: “Amana otakha onwahi okitwaharesha!” ⁴¹ Yinsa ari wawiitaala huruma, khookola nkhoona awe khunsapa na khulupa yoori: “Kintakha. Wiiye wootwahareshiwa!” ⁴² Nasaapiru maaharaja apale khwiya omwiisha na ye khwiya wootwahareshiwa. ⁴³ Elottelanaka Yinsa khuwaaleeza na awaaleezaka woomaruwavo, ⁴⁴ aphano Yinsa khumuuzo yoori: “Ohimuze hatha nthu, ila olawe, wanvekele haakhimu yoori awoone nkhamo wavona, arette twaha etile Munsa arumiyeeyo yoori wiiye oshaahiti. ⁴⁵ Ila mwinyi otule khusala alawa na khwaaza olaleya vitthu epile na omwaza hapari. Mwaasa

wa vitthu epile, Yinsa khuhisala awahi theenya weetta nsitati, ila khwiikhala othetekele puuro yawiitthaaleyavo. Khusala ata atthu wakhula phantte oteela okutthanana Yinsa.

2

Ovonisiwa wa namarakala nti wa Kafwaranaawu

¹ Paata ya siikhu vattitthiiru, wakathi Yinsa aaruteliyeeyo theenya Kafwaranaawu, atthu khusiila elupiwaka yoori ye aari owawe.

² Aphano atthu awaatta khweetta ottuukhule, khwa nanna ya haariivo puuro hatha vamilako, na khusala awaatafusirela nttakhuzi la Nluku.

³ Khutavo atthu akina antiisiyeeyo ntthu aarina supiyaani, athuuliwe pi alume wane.

⁴ Khuhisala awahi onfiisa aphale aariivo Yinsa mwaasa wa atthu waatta. Elottelanaka khulawa khutamula phantte ya liphala la nyuupa, khuphenyisavo nrepa opule arapaleliyeevo nasupiyaani.

⁵ Oniyeevo amini etile aariina, Yinsa khumuuzza nasupiyaani otule yoori: “Mwanaka, twampi zawo zaswaamihiwa.”

⁶ Eekhaliye attaaphale anamanozela a kano akina na khwaaza wuupuwela: ⁷ “Mwinyi otu onttakhula toowo mwaasa wa niini? Ontta okufuru! Anwahaaye oswaamihi twampi ti paani, woohiyyi Nluku paasi?”

⁸ Yinsa nasaapiru khumweeleya nroho mwawe yoori zaari etthiipo epile yo aari wuupuwelaaye na khuwooza yoori: “Mwaasa aya niini mweeyo muupuwelaka vitthu epo nroho mwenu? ⁹ Etthu yookhweya omuuzza nasupiyaani titiivi, omuuzza yoori: “Twampi

zawo zaswaamihiwa’ ama ‘Olankhe othuule nrepa lawo weettette?’ ¹⁰ Ila yoori mwijuwe yoori Mwaana wa Pinaatamu onaaye owahi wa oswaamihi twampi” khumuuzi nasupiyaani ¹¹ “Miiyo kiniwuuza: Olankhe, othuule nrepa lawo olawe owawo.” ¹² Wakathi otthuupule mwinyi otule khulankha ooniwaka pi atthu ooshi, khuthuula nrepa lawe khusaruwa. Yo khwiiya ooshanka na khunttitthimisa Nluku, alupaka yoori: “Khaninoone vitthu nkhamama epi!”

Okhuweliwa wa Matewuzhu Leevi

¹³ Yinsa khulawa theenya kharipu ya ntthatta. Atthu awaatta khumwaattama na khwaaza owaasomisa. ¹⁴ Eettaka ovira etthiipile, khumooni Matewuzhu mwaana wa Alufeeyu eekhaliye ariphisaka lumpuru, khumuuzi yoori: “Okilotte.” Ye khulankha khunlotta.

¹⁵ Wakathi wa etthu yoojiwa, Yinsa eekhaliye va meeza owawe Leevi. Vamote na anakhiyoni awe, na aarivo anamariphisa lumpuru awaatta na “anatwampi” maana atthu aari onlottaaye aari enkeene. ¹⁶ Anamanozela a kano apale amafwarizeewu amooniyeewo ajaka na “anatwampi” na anamariphisa lumpuru, khuwoozela anakhiyoni a Yinsa yoori: “Mwaasa aya niini ye ajaka na anamariphisa lumpuru na anatwampi?” ¹⁷ Asiliyeewo vitthu epile, Yinsa khuwoozela yoori: “Akumi khaminhithajiya tothoro, ila apale anlwaziwaaye. Miiyo akateeliye owaakhuwela anashariya, ila anatwampi.”

Yinsa onuuzeliwa monkoni wa ofuka

18 Aphano anakhiyoni a Yaahaya na mafwarizeewu eetta ofuka. Athu akina khunteela Yinsa khusala amuuzela yoori: “Mwaasa aya niini anakhiyoni a Yaahaya na amafwarizeewu ofuka, khi awo ahifukaka?”

19 Yinsa khujipu yoori: “Enretteya toovi ofuka anamalaleyiwa harusi, namaposa ari attaapho? Khinwaheya, ari vamote na yo.”

20 Ila onteela ofiya siikhu mposi anteelaaye olaziwavo, siikhu zaya epo, anlawa afuke. 21 Khina antthaaye yaapa pheeya kuwo yoovutta, maana yaapa etile pheeya enttela ofutthela kuwo yoovutta etepe othaala.

22 Khina antthaaye viinyu nttompwiyo ya shapala ya raku, amana aretta, viinyu entta ophutula ttompwiyo, waaza viinyu mpakha ttompwiyo zintta oharipweya. Ila mwiththe viinyu pheeya nttompwiyo ya shapala pheeya.

Mbwana wa saapatu

23 Saapatu moote, Yinsa eetta ovira nshini wa nshapa la tiriku. Eettaka olawa, anakhiyoni awe khwaaza ovulula phunje zaya.

24 Mafwarizeewu khumuuzela Yinsa yoori: “Oniwoona, mwaasa aya niini yo arettaka etthu enkhattaziwaaye orettiwa saapatu?”

25 Ye khuwaajipu yoori: “Mweeyo khamwinasome etile arettiyeeyo Daawuuda wakathi ye na ashirikha awe aakholiweeyo ti jala? 26 Wakathi wa haakhimu nwulu wa tiini Apiyataari, Daawuuda aaviriye Nnyupa wa Nluku khurafuna phaawu enkhiweeyo Nluku na khuwenkha ashirikhaawe, aariina ruhusa ya orafuna paasi aari anamalokozela a tiini.” 27 Aphano khuwooza

yoori: “Saapatu yatiisiwa mwaasa wa anaatamu, ama anaatamu mwaasa wa saapatu. ²⁸ Etthiipo, Mwaana wa Pinaatamu ti Mbwana hatha na Saapatu.”

3

Mwinyi woorakala nkono

¹ Yinsa khurutela theenya nsinakooka, nttumphule aarimo mwinyi waarakaliyeeyo nkono awe. ² Atthu akina aari weekesa nanna ya onlokoveza Yinsa, yoori amoone nkhamaa aari weettela ovonisa siikhu ya saapatu. ³ Yinsa khumuuzaa mwinyi otule woorakala nkono yoori: “Olankhe ote vakatthi apha.” ⁴ Aphano Yinsa khuuzela yoori: “Niini entakheliwaaye orettiwa saapatu, oretta yooshapweya ama yootakhala, wuusuru ama wuula?” Ila atthu apale nalelo khwiiya oonyamala. ⁵ Yinsa khusala aweekesa ari wookatipukha na khuhituveliwi mwaasa wa wuuma rooho zaya na khumuuzaa mwinyi otule yoori: “Wookole nkono awo.” Ye khookola nkono awe na khwiiya woovonisiwa. ⁶ Aphano mafwarizeewu apale khulankha na khwaaza owaza shawuri vamote na khuntti ya Herooti eekesaka nanna ya omuula Yinsa.

Yinsa oneekesiwa pi atthu awaatta

⁷ Yinsa na anakhiyoni awe, khulawa mpakha ontthatta la Kalileya na nyumani wawe yaari ota khuntti khuluyeene ya nti wa Kalileya. ⁸ Wakathi asiiliyeevo vitthu zooshi aari orettaazo, atthu awaatta aari olankhaaye Yudeya, Yeruzaleemu, Itumeeya, akina akaapu wa muuttho Yorotaani

na apale a Tiiro na Sitooni khuta okutthanana ye. ⁹ Mwaasa wa khuntti khuluyeene etile, Yinsa khuwooza anakhiyoni awe yoori antthekezele mwaatiya yoori awerawere ophunyiwa. ¹⁰ Maana ye awaavonisiye atthu awaatta, khwa nanna ya apale aari olwaaziwaaye aari ofiyelelaaye osukhumana yoori apatthe onsapa. ¹¹ Theenya masheethwani, amana amoono eetta onkokhorela omaasho wawe na onyakula araka: “Weeyo o Mwaana wa Nluku.” ¹² Ila ye aari owenkha oruma wookhomaala yoori ahinlupe paani yaya.

Othawuliwa wa maaswihaapa khumi na awiri

¹³ Yinsa khuwela vakulu na khuwaakhuwela apale aari owaatakhaaye, apo aya khuta aphale aariivo. ¹⁴ Khuwaathawula khumi na awiri na khuwenkha nzina la maaswihaapa yoori eeye vamoto na-ye na yoori ye awaarume olaleya, ¹⁵ na eeyane owahi wa wiikara masheethwani. ¹⁶ Apa pi apale khumi na awiri awathawuliyeeyo aari witthiwaaye yoori: Simawu, otule amwinkhiyeeyo nzina la Pheeturu; ¹⁷ Tiyaaku, mwaana wa Zepeteewu, na Yaahaya twiye, atthaapo aatthajiweeyo nzina la Buneerije, liriina maana a “Aana a Ottitthima”; ¹⁸ Antere, Filiipe, Barutulumewu, Matewuzhu, Tome, Tiyaaku, mwaana wa Alufeeyu, Tadeewu, Simawu Zelooti; ¹⁹ na Yuuda Eshikariyoote, otule ankhosisiyeeyo Yinsa.

Okufuru wa anamanozela a kano

²⁰ Aphano, ye khulawa owawe, khukusanyeya opheya khuntti khuluyeene, khwa nanna ye na anakhiyoni awe aari woojelaavo oja. ²¹ Wakathi

ajamaaze asiiliyeevo vitthu epile, khulankha khusala alawa onthuulawo, maana aari olupa yoori: “Ye eetta ovevereya.” ²² Anamanozela a kano aalankhiyeeyo Yeruzaleemu aari olupa yoori: “Ye ti wooshinttiwa ti Epiliisi! Mfwalume wa masheethwani ti othuuto aniweekaranaaye masheethwani.” ²³ Aphano Yinsa khuwaakhuwela khusala awaanozela nkatthi wa milikaniso yoori: “Nanna-ni Epiliisi antakhaaye omwiikara Epiliisi?” ²⁴ Amana ofwalume mmote ojaawanya, khunwahi ojishintta otthuuporu. ²⁵ Ama nyuupa amana ejaawanya, theenya khinwahi wiikhala ethiitoru. ²⁶ Na Sheethwani nkhamana ontta ojuumanana, na amana aawanyeya, khanlawa owahi wiiyavo na wafiya mwiisho wawe. ²⁷ Weekhweele khina anwahaaye ovira nnyupa wa ntthu wookhomaala na khuthuula maali zawe aheetteeni onfuka khapula. Toowo ti anwahaaye omwiiyela nnyupa mwawe.

²⁸ “Miiyo kiniwuuzani khweele yoori: Twampi zooshi na okufuru wooshi wa anaatamu onlawa waswaamihiwe, ²⁹ ila otule ankufurwe-laaye Rooho Ttakatthiifu, khana nswammaha mileele, maana ona twampi ya mileele.” ³⁰ Yinsa aalupiye mattakhuzi apa mwaasa wa yo aari olupa yoori: “Ona sheethwani.” ³¹ Elottelanaka, mamaawe na attwiize Yinsa khuta. Khwiiya vaje na khuruma okhuweliwa Yinsa. ³² Aarivo atthu awaatta eekhaliyeeyo aphale aariivo, na khuuziwa yoori: “Mamaawo na attwiizo ari vaje apho antta oweekesa.” ³³ Yinsa khuuzela yoori: “Maama ti tuuvi, wala ttwiiyaku ti tu-

uvi?” ³⁴ Aphano khuweekesa apale eekhaliy-eeyo aphale aariivo na khuwooza yoori: “Apha owaapho maama na attwiizaku! ³⁵ Otule anrettaaye matakhello a Nluku, ti eeyiye ttwiiyaku, nlupwaaka na maama.”

4

Nlikaniso wa Namazala

¹ Yinsa khurutela osomisa kharipu ya ntthatta. Khutavo atthu awaatta aphale aariivo, khusala ahithajiya weetta nkalawa na eekhale nttumpho. Kalawa yaari mpahari, atthu ooshi khwiikhala nshini wa pahari. ² Ye aari owaasomisa vitthu zawaatta nkatthi wa nlikaniso, asomisaka khuri: ³ “Mwisiile! Namalima khulawa ozala. ⁴ Wakathi aari ozalaavo peewu, phante kiina khukwela nshini wa tarikhi anyannyi khuta khuja. ⁵ Kiina khukwela vahali aariivo mawe, vahali laarivo nntophe vattitthiiru; nasaapiru khootta, maana nntophe ntthile khaleechiye. ⁶ Aphano noopuwa njuwa khulukuza; maana khazaarina mitathaari, khuuma. ⁷ Peewu kinoko khukwela vanyiiwa, khuwula vamote na nyiiwa, khurapeliwa pi nyiiwa, khwa nanna zahawahiyeeyo wiima mishumo. ⁸ Kiina khukwela vanshaka wooshapweya, khootta, khuwula na khwiima mishumo zooshwapweya, talaathiini, siithiini na mpakha miiya wakhula mmote. ⁹ Yinsa khwiishela alupaka yoori: “Otule ariina mashiilo, ti asiile!”

Otaphuleliwa wa nlikaniso

¹⁰ Wakathi ye aari otthwe, anakhiyoni apale khumi na awiri na akinoko aari kharipu ya attaaphale khumuuzela monkoni wa nlikaniso. ¹¹ Ye khuwoza yoori: “Mweeyo mwenkhiwa ojuwa kano za ofwalume wa Nluku, ila apale ari oje, zooshi anuuzaniwa nlikaniso, ¹² yoori ‘hatha nkhamama oona ahijuwe, hatha nkhamama asiila ehiweeleye yoori ahizukulise rooho zaya aswaamihiwa!’” ¹³ Aphano Yinsa khuwozela yoori: “Mweeyo khuniweeleyani nlikaniso opu, nanna-ni onteela oweeleyani epi mikina? ¹⁴ Namazala onzala nttakhuzi. ¹⁵ Atthu akina ari nkhamama peewu eriiye nshini wa tarikhi, nhali lizaliweemo nttakhuzi. Paata ya osiila, Epiliisi onta, khulazavo nttakhuzi ntthile nroho mwawe. ¹⁶ Akina, ari nkhamama peewu ezaliweeyo vahali wawiiyavo mawe, ansiilaaye nttakhuzi nasaapiru khupwekherela na furaha. ¹⁷ Ila paata ya wakathi vattitthiiru, atthu aya apo anlawa akatthale hapari maana kharetteeni wiiya nchina laya, amana ziwaapattha tafwawuthi ama lupattha mwaasa wa mattakhuzi apale antta wanswi. ¹⁸ Theenya akina anlattanana na peewu ezaliweeyo vakatthi wa mwiiwa. Apo ansiila hapari, ¹⁹ ila, amana ziwaapuwelelaka tafwawuthi za olumwenku opu, tuvela za maali na otakha nkina, vitthu zaya epo enshawa nttakhuzi na epo zaya khaziniimisa mishumo. ²⁰ Awaapho theenya atthu akina, anlikananaaye peewu ezaliweeyo nti wooshapweya. Apo aya ansiila nttakhuzi khukhupalela na khuttheerisa talaathiini, siithiini na mpakha miiya khwa etile aazaliyeeyo.”

Nlikaniso wa likhompe

²¹ Ye khuwooza yoori: “Paani ankhozaaye khantteya yawe khuttha n'yuuku ama nlivuku? Olikha toowo khampweha vahali wawooneyavo?”

²² Maana khayiivo hatha etthu moote ya siiri, ehinttelaaye wiiya payana na khayiivo moote yoovithiwa ehinttelaaye ovitthuliwa.

²³ Nkhama ntthu onaaye mashiilo oosiila, asiile!” ²⁴ Aphano, khuwooza yoori: “Phoole na epile mwinsiilaaye. Na mphimo otthuupo mwinttelaaye owaaphimela azeenu, mwinttela ophimeliwa otthuupo, na theenya mwinkeene mwinlawa mweekezelewe. ²⁵ Otule ariina, onlawa eekezelewe; ila otule ahina hatha etile vattitthiiru ariinaaye ontta onyakanyiwa.”

Nlikaniso wa Peewu

²⁶ Ye khurutela olupa yoori: “Ofwalume wa Nluku ori nkhama ntthu anzalaaye peewu yawe vathi. ²⁷ Hatha nkhama eetta olankha, ama hatha nkhama eetta olala, yo zinoottha na zinwula, ye woohijuwi nanna erettikhaniyeeyo. ²⁸ Otthuupo oniima mishumo zaya: yamwanzo nyaani, elot-telanaka ntathi, mwiisho, phunje zawiitaala va ntathi. ²⁹ Amana peewu ekhomaala, ntthu ontela othuula eesu, maana wafiya wakathi wa wuu-rula.”

Nlikaniso wa phunje ya samuli

³⁰ Yinsa khurutela olupa theenya yoori: “Ofwalume wa Nluku onlattanana niini? Nlikaniso-ni ninttelaaye orumeyela yoori nithoonyeze?” ³¹ Ori nkhama phunje ya samuli, etile yiyiye phunje yootepa opushuwa vathi

apha. ³² Ila, paata ya ozala, zintta owula channu, zayita mathapa ooshi.” ³³ Khwa milikaniso zooshi zoolattana, Yinsa aari owooza monkoni wa nttakhuzi, nanna aari owahaaye oweeleya. ³⁴ Khaari owooza hatha etthu ahirumeyeleeni nlikaniso, ila amana eeya na anakhiyoni awe paasi, eetta owoozaka zooshi.

Yinsa onnyamaza pheevo

³⁵ Siikhu etile, weettelaka oripa, Yinsa khu-wooza anakhiyoni awe yoori: “Nlaweni kaapu kiina.” ³⁶ Paata ya osusa khuntti etile, yo kupa-khira nkalawa mphule aariimo Yinsa. Na kalawa kiina zeetta owaaperekha. ³⁷ Khwaaza ovuma pheevo yookhomaala, na mawipi khusala apiya kalawa yaya khwa nanna aari wiitaalaamo maati. ³⁸ Yinsa aarettiye eettaka olala sheezi aphi-teeziye nsaawu. Aphanu anakhiyoni awe khun-lansa na khumuuzi yoori: “Mwaaliimu, khinuu-jali fweeyo nifwaka?” ³⁹ Yinsa khulankha khun-yamaza pheevo na kuuza pahari yoori: “Othe nreke! Onyamale!” Pheevo khunyamala na zooshi khwiiya zawiitthaala. ⁴⁰ Aphanu khu-woozela anakhiyoni awe yoori: “Mwaasa aya nini moovaka toowo? Nalelo khamwina amini?” ⁴¹ Anakhiyoni apale ari awoova channu, khusala oozana yoori: “Ti paani otu aya, anshututeli-waaye ti pheevo na pahari?”

5

Ovonisiwa wa namasheethwani

- ¹ Yo khulokha pahari, khufiya Jerazeenu.
- ² Wakathi Yinsa apakhuwiyeevo nkalawa,

mwinyi mmote aariina sheethwani khusaruwa nvilalo khuta attaaphale. ³ Mwinyi aya oto aari wiikhala nvilalo, khina mmote aari owahaaye onkhola, hatha ari ntthentte. ⁴ Maana swaafu zawaatta aari wiiya ntthentte moolu awe na makhono awe, ila ye eetta opwechaka tthentte yaya na ovuja zuuma zaari otthiwaaye mmoolu mwawe. Khaarivo ntthu wookhomaala aari owahaaye onshintta. ⁵ Osikhu na nthana ye aari weettettaka nvilalo na nnyaako na ojishija na mawe. ⁶ Wakathi amooniyevo Yinsa ari peetiwenene, khutthira khulawa khukokhora omaasho wawe. ⁷ Khukhuwa na huula yawe yooshi araka: “Onikitakhelani miiyo, Yinsa mwaana wa Nluku Nwulu? Kinuuvekela khwa Nluku yoori ohikoopopise!” ⁸ Maana Yinsa aamuuziye yoori: “Oleemo mmwiili wa mwinyi otu, sheethwani.” ⁹ Aphano Yinsa khumuuzela yoori: “Nzina lawo enriwa paani?” Khujipu yoori: “Nzina laka enriwa khuntti, maana niri awaatta.” ¹⁰ Khusala anvekela wonkhanyarelavo yoori ahiwaarume olaamo mmuti mwaya mphule. ¹¹ Liphanko liwululene la kuluwe laari oshukisiwaaye kharipu ya mwaako. ¹² Masheethwani apale khusala anvekela Yinsa yoori: “Onirume yoori neette nkuluwe mphule.” ¹³ Yinsa khwinkha ruhusa masheethwani apale, khusaruwa khweetta nkuluwe. Liphanko laarina thamani ya alufu piiri za kuluwe, khwaaza otthira zilankhaka omwaako ziishukhelaka mpahari, zooshi khuzama khufwa. ¹⁴ Apale aari oshukaaye kuluwe zaya epile, khutthira khulawa olupa vitthu epile zaarettikhaniyeeyo waaza nsitati

mpakha mmashapa, atthu khulankha olawa woona epile zaarettikhaniyeeyo. ¹⁵ Wakathi amwaattamiyeeyo Yinsa, khumoonna mwinyi otule aamwitaliyeeyo masheethwani awaatta, eekhaliye awaliye saana na atthiiyemu akhili zawe, atthu apale khwiiya awoova. ¹⁶ Apale aari attaaphale, khuwooza atthu zooshi epile zanrettikhaneliyeeyo mwinyi otule aariina masheethwani, na theenya khulupa monkoni wa kuluwe. ¹⁷ Aphano atthu apale khusala anvekela Yinsa yoori aleemo mmuti mwaya mphule. ¹⁸ Wakathi Yinsa aari owelaaye nkalawa, mwinyi otule aariina masheethwani khunvekela Yinsa yoori anlikhe alawe na ye. ¹⁹ Yinsa khuhinkhupaleli, ila khumuuzza yoori: “Olawe owawo wawuuzze ajamaazo zooshi epile Mbwana ooretteliyeeyo na tthakaraka awooneliyeeyo.” ²⁰ Aphano, mwinyi otule khulawa na khwaaza olupa nti wa Tekapoliishi etile Yinsa anretteliyeeyo. Atthu ooshi khwiiya ooshanka.

Owahi wa Yinsa monkoni wa marati na ofwa

²¹ Yinsa khupakhira theenya nkalawa alokhelaka kaapu kiina, khuntti khuluyeene khuta khwiitaala aphale aariivo Yinsa nshini wa nttima. ²² Aphano khuta attaaphale namalokozela mmote wa nsinakooka aari wiiitthiwaaye Yaayiru, amooniyeeyo Yinsa, khukokhora nshini wa moolu awe. ²³ Khunvekela wookhanyarelavo yoori: “Mwanaka wankha onsaleela ofwa! Safwatali ote, wanttheele makhono yoori eeye woovona na eeye haayi.

24 Yinsa khusala alawa vamote na-ye, khuntti khuluyeene khusala enlotta na omphunya.

25 Attaaphale, aarivo muukha aariina nyaakha khumi na miwiri eettaka ohoowa mwaasa wa omwiittikha taamu. 26 Ye ahoowiye channu khwa oweekesa anamavonisa na khuharipu nzurukhu awe wooshi aariina, olikha ovona khusala eetta wootepa. 27 Asiiliyeevo ovuwa wa Yinsa, khuta nyuma wawe vahali wawaattiwavo na khusapa ajapi yawe. 28 Maana aari wuupuwela yoori: “Miiyo kisaparu paasi ajapi yawe, kintta ovona.”

29 Nasaapiru yeetta olikha wiittikha taamu etile na muukha otule khoona yoori mmwiili mwawe aari wootaphuliwa ohoowa opule. 30 Wakathi otthuupule, Yinsa khoona yoori wansaruwa owahi, khuzukuluwa khweekesa khuntti etile khuuzela yoori: “Paani asapiyeeyo ajapi yaka?”

31 Anakhiyoni awe khujipu yoori: “Woonaka khuntti khuluyeene eti ekusanyeyiyeevo, khusala wuuzela yoori: ‘Paani akisapiyeeyo?’ ” 32 Ila Yinsa nalelo khusala eekesaka vakatthi wa khuntti etile yoori amoone otule aarettiyeeyo etthu yaya etile. 33 Aphano muukha otule, ajuwiyeeyo etthu yaarettikhaniyeeyo, khumwaattama khukokhora nshini wa moolu awe eettaka othukumela mwaasa wa woova, khulupa haakhi yooshi.

34 Yinsa khumuuzi yoori: “Mwanaka, amini yawo yoovonisa. Olawe na heeri, na wiye wootaphuliwa ohoowa wawo.”

35 Nalelo Yinsa eettaka ottakhula, khutavo athu a owawe Yaayiru, namalokozela wa nsinakooka khumuuzi yoori: “Mwanawo afwa. Khinihithajiya onwuti theenya Mwaaliimu!”

³⁶ Yinsa khumuuzwa namalokozela wa nsinakooka mphule yoori: “Ohoove; okhupali paasi.” ³⁷ Na khuhinlikhi hatha nthu onlotta, woohiye Pheeturu, Tiyaaku na Yaahaya ttwiye Tiyaaku. ³⁸ Wakathi afiyevo owawe namalokozela wa nsinakooka, Yinsa khoona tafwawuthi na athu eettaka olila na ojiliza na huula ya onyakula. ³⁹ Yinsa khuvira nnyupa na khuuzela yoori: “Tafwawuthi yaya eti ti-ya niini na mwinjilizelani? Mwaana khafweeni, ontta olala.” ⁴⁰ Ila ooshi khwaaza ontheya Yinsa. Ye khurumisa yoori aleemo ooshi, khunthuula papaawe na mamaawe mwaana na anakhiyoni awe apale aariina na khulawa aphale aariivo mwaana. ⁴¹ Khunkhola nkhoona awe khuri: “Talitha cumi!” liriina maana a “Mwanankha, miiyo kinuuruma yoori olankhe!” ⁴² Nasaapiru mwanankha otule, aariina hirimu ya nyaakha khumi na miwiri, khulankha na khwaaza weetteta. Ooshi aariivo khwiya ooshanka. ⁴³ Ila Yinsa khuwoza woosileyavo yoori: Ahiiyevo hatha nthu anttelaaye ojuwa, na khuruma winkhiwa etthu-yoojiwa.

6

Napiyu mmote wootarawiwa

¹ Yinsa khulaawo okhule waya, khweetta sitati ya owawe, anakhiyoni awe khusala amperekha. ² Noofiya saapatu, khwaaza osomisa nsinakooka, awaatta aari onsiilaaye khwiya ooshanka, alupaka yoori: “Zininlankha vayi vitthu zaya epi?” ‘Ojuwani opu enkhiweeyo? Na onretta toovi minjuza? ³ Khahiyo kalapintero otu, mwaana wa

Mariyamu, ttwiiye Tiyaaku, Yuusufu, Yuuda na Simawu! Alupuwe khari nttumphu!” Khwi-
iya awiiphiriwa ti Yinsa. ⁴ Yinsa khuwooza
yoori: “Mmuti mwawe, vakatthi wa ajamaaze na
vaje vawe pi attaapho napiyu ahinshitahiwaavo.”
⁵ Ye khawahiye oretta minjuza Nazareeti, woohi-
iyi owaavonisa alwele akina khwa owaattheela
makhono. ⁶ Khwiiya wooshanka mwaasa wa
othowawo amini okhule waya. Yinsa khuvira
asomisaka miti zaattameliyeeyo ottuukhule.

*Yinsa oniwaaruma anakhiyoni awe khumi na
awiri*

⁷ Khuwaakhuwela anakhiyoni awe apale
khumi na awiri, khuwaaruma awiri khwa awiri
na khuwenkha owahi wa wiikara masheethwani.
⁸ Khuwaaruma yoori: “Mwihithuule hatha etthu,
yohiiyi pakhora, khamwaarina ya othuula etthu-
yoojiwa wala kaapiyaka wa safwari na nzurukhu.
⁹ Mwiwale jampali, ila mwihithuule nkhumu wa
phiiri. ¹⁰ Amana mwifiya nyuupa moote, mwiiye
attaapho mpakha siikhu mwinttelaaye olaavo.
¹¹ Na miti mikinoko amana zihuupwekhereleni
na khuhuusiilini, mwitathe lifufu la mmoolu
mwenu mwilaakamo, nkhamo oshaahiti vakatthi
vaya.” ¹² Yo khulawa na khulaleya atthu yoori
athupwiye. ¹³ Yo aari wiikara masheethwani
awaatta na owaavaaza mafuttha mmwishwa
mwaya na owaavonisa alwele awaatta.

Ofwa wa Yaahaya Namoosa

¹⁴ Mfwalume Herooti khusiila elupiwaka
hapari epile, maana nzina la Yinsa laajuwiwe
saaneene. Atthu akina khwaaza olupa yoori:

“Yaahaya Namoosa eetta osisimuwa muufwa! Tiito zinrettikhanaaye minjuza zootikinisa khwa ye.” ¹⁵ Akina aari olupa yoori: “Ye ti Aliyaasi.” Akinoko khusala olupa araka: “Ye napiyu, nkhamanapiyu apale a raku.” ¹⁶ Ila Herooti wakathi asiiliyeevo vitthu epile, khuri: “Yaahaya, mwinyi kinshijiyeeyo, asisimuwa muufwa!” ¹⁷ Maana Herooti aarumiye yoori akholiwe Yaahaya, afukeliwe nkalapooso, mwaasa wa Herootiia, muukha wa Filiipe ttwiye, othuuto anraliyeevo. ¹⁸ Mwaasa wa Yaahaya aari omuuzwa Herooti yoori: “Khahi halaali weeyo onrala muukha wa ttwiyo.” ¹⁹ Herotiiya aarina katapu khwa Yaahaya, khusala atakha omuula, ila khuhisala awahi oretta, ²⁰ mwaasa Herooti aari omoova Yaahaya na aari omwiinanela, maana aari ojuwa yoori ye mwinyi wa shariya na ttakatthiifu. Amana ansiilaka, eetta oshanka; khwa etthiipo waari ontuvela onsiila. ²¹ Omwiisho Herotiiya khupattha kiphenyo siikhu ya oretta mwaakha Herooti. Khuretta njampo Herooti na anamalokozela awe awulu, attunkhulu a anajanka na ooshi apale eeyiye afwalume a nti wa Kalileya. ²² Wakathi mwaana wa Herotiiya aviriyeeyo khwiina, khuntuvela Herooti na apale awaakharipushiyeeyo. Mfwalume khumuuzwa mwanankha otule yoori: “Okivekele wakhula etile ontakhaaye kintta owinkha”. ²³ Khumwaahiti khwa olapha yoori: “Wakhula onikivekelaaye, kintta owinkha, mpakha phantte ya ofwalume aka.” ²⁴ Mwaana otule khusaruwa khumuuzwa mamaawe yoori: “Kiveke niini?” Mamaawe

khunjipu yoori: “Oveke eeshwa ya Yaahaya Namooosa.”²⁵ Nasaapiru mwanankha otule khwaakuva khulawa wa mfwalume khuveka yoori: “Kintakha mwikinkhe nasaapi eeshwa ya Yaahaya Namooosa mparathu.”²⁶ Mfwalume khwiiya woohuzunikha channu, ila mwaasa wa olapha opule aalaphiyeeyo na wa apale awaakharipushiyeeyo, khuhiwahi okatthala etile avekeliweeyo ti mwanankha otule.²⁷ Nasaapiru khunruma najanka khumuuzo ontiisela eeshwa ya Yaahaya Namooosa. Ye khulawa okalapoozo, khushija eeshwa ya Yaahaya Namooosa.²⁸ Khuttha mparathu khumwinkha mwanankha otule na ye khumwinkha mamaawe.²⁹ Noosiila hapari epile anakhiyoni a Yaahaya namooosa, khuta khuthuula mwiili awe khulawa khuzikha.

Yinsa oniwaajisa alume alufu thaanu

³⁰ Maaswihaapa khurutela aphale aariivo Yinsa khumuuzo zooshi arettiyeeyo na asomisiyeeyo.
³¹ Aarivo atthu awaatta aari otaaye na olaavo, paata ya Yinsa na anakhiyoni awe woona yoori khaarina kiphenyo ya oja. Ye khuwooza yoori: “Mwite nilawe puuro yawiitthaleya navumule vattitthiiru.”³² Aphano yo khulawa nkalawa mpakha puuro yawiitthaliye.³³ Atthu awaatta khuwoona alawaka paata ya owaajuwa. Atthu a miti zooshi za ottuukhule, khutthira khufiyawo yo ahinafiye.³⁴ Eeshukhaka nkalawa Yinsa, khoona khuntti khuluyeene ya atthu, khuwoonela huruma, maana aari nkhamapwittipwitthi zoohina makhampuzi. Aphano khwaaza owaasomisa vitthu zawaatta.³⁵ Weettelaka oripa, anakhiyoni

awe khunsusela khumuuzza yoori: “Puuro eti ti yawitthaaleya, na waripa. ³⁶ Owaamwaze atthu apa yoori alawe mmashapa na miti epile naatamiyeeyo yoori oozanye etthu yoojiwa aje.” ³⁷ Ila ye khuwaajipu yoori: “Mwiwenkhe mweeyo ena etthu yoojiwa.” Yo khumuuzza yoori: “Atthu apa yoori aje, ninhithajiya miiya piiri za nzurukhu wa feeta!” ³⁸ Yinsa khuuzela yoori: “Mwina phaawu kavi? Mwilawe moone.” Anakhiyoni apale khulawa khoona khujipu yoori: “Ninaaye phaawu thaanu na swi piiri.” ³⁹ Aphano, Yinsa khuwaaruma yoori ooshi eekhale, khuntti khwa khuntti va nyaani piishi ⁴⁰ Khuretta etthi-ipo khwaawanyeya khwa khuntti ya miiya na khuntti ya hamusiini. ⁴¹ Athuuliyeevo phaawu epile thaanu na swi piiri khweekesa pinkuuni khuparikhiya. Nawiisha khumeya phaawu epile khuwenkha anakhiyoni awe yoori awaawanyeze atthu apale. Theenya khuwaawanyeza swi epile piiri ooshi aya. ⁴² Ooshi khuja khurupala, ⁴³ na anakhiyoni khulokotthela khwiitaala khelenke khumi na piiri za nyeenye za phaawu na za swi. ⁴⁴ Atthu aajiyeeyo aari alufu thaanu alume ene.

Yinsa oneettetta vatulu wa maati

⁴⁵ Elottelanaka, Yinsa khuwaaruma anakhiyoni awe yoori awele nkalawa alokoze Betezayiita phantte ya kaapu ya ntthatta, wakathi ye asaliyeeyo aleezananaka atthu. ⁴⁶ Paata ya oleezanana, khuwela vakulu yoori alompe. ⁴⁷ Weettelaka oripa, kalawa yaari vakatthi wa pahari na Yinsa aari otthwe vathi. ⁴⁸ Ye khuwoona anakhiyoni awe afutthaka kaafi woovelavelavo, maana eetta

wiinyula pheevo. Lifwajiri, Yinsa khulawa aphale aariivo eettettaka vatulu wa pahari, khusala asaleela owaavikana. ⁴⁹ Wakathi amooniyeevo eettettaka vatulu wa pahari, khusala amoona nkhamana nshitapehe, aphanu khusala anyakula. ⁵⁰ Maana ooshi aamoniyeeyo aari oosuthuwa. Ila Yinsa nasaapiru khuwooza yoori: “Mwiminyale! Ti miiyo! Mwihoove!” ⁵¹ Aphanu Yinsa khuwela nkalawa khwiiya vamote na anakhiyoni awe, na pheevo khunyamala, na yo khwiiya ooshanka, ⁵² maana khazaaweleyiye minjuza za phaawu. Rooho zaya zaari zookhomaala.

Yinsa oniwaavonisa alwele a Jenezare

⁵³ Paata ya olokha pahari, khufiya Jenezare, ottuukho khufukelela kalawa yaya. ⁵⁴ Wakathi apakhuwiyeevo athu khunjuwa Yinsa. ⁵⁵ Yo aari ovira azukulelaka nti wooshi opule, na owaathuula alwele aya va nrepa awaalawanaka ohali aari osiilaawo yoori Yinsa ori ottuukho. ⁵⁶ Wakhula vahali aari weettaawo, mmamuti, nsitati ama mmashapa, aari othuuliwaka alwele na olawaniwa mparasa. Noovekeliwa yoori nenkawu awahi osapa nshaka la ajapi yawe; maana ooshi apale aari osapaaye aari wiiya oovona.

7

Yinsa vakatthi wa zowera za Eyahuuti

¹ Mafwarizeewu na akina anamanozela a kano alankhiye Yeruzaleemu khukusanyeya na Yinsa. ² Khusala awoona anakhiyoni awe akina eettaka oja na makhono aharaamu, enlupaaye yoori

khanaweeni. ³ Mafwarizeewu na mayaahuuti ooshi khanja ahinaweeni wotwahareshiwavo, alottelaka zowera za attunkhulu a tiini. ⁴ Amana aruti oparasa, khannja ahaazeeni woosa makhono aya khapula. Anthokorela masomi makina a waatta, nkhamama woosa pilawuri, mirinki, zoopo za malaatha na moolili. ⁵ Aphano mafwarizeewu na anamanozela a kano khumuuzela Yinsa yoori: “Mwaasa aya niini anakhiyoni awo ahilottelaka zowera za attunkhulu a tiini, khusala aja ahinaweeni?” ⁶ Ye khuwaajipu yoori: “Manaafikhi! Ezaaya ahupiri saaneene monkoni weenu mweeyo nkhamama etthiipo yaatikhiweeyo yoori: ‘Atthu apa anikishitahi na malimi, ila rooho zaya ziri peetiwenene na miiyo. ⁷ Anikaaputu mahala na ansomisa mwentto wa oruma wa eenaatamu. ⁸ Mweeyo mwintarawu mirumo za Nluku na khusala mwilottela zowera za enaatamu. ⁹ Yinsa khwiishelana awoozaka yoori: “Mweeyo mwineekesa yoori mwitthe othetekele mirumo za Nluku mwaasa wa oshututela masomi enu! ¹⁰ Maana Munsa alupa yoori: ‘Onshitahi papaawo na mamaawo,’ na ‘antakhaaye onlaani papaawe na mamaawe ona ya ohukhumweliwa ofwa.’ ¹¹ Ila mweeyo mwinkhupalela yoori amana ntthu amuuza papaawe ama mamaawe yoori: Wakhula etthu kiniwinkhaanini miiyo zaakha ya omwinkha Nluku,’ ¹² khwa nanna eto mwiwerawere ojikhanyarela omwaawuni papeenu na mameenu. ¹³ Toowo mweeyo khamwintha fwayita nttakhuzi la Nluku, khwa opatilana zowera zinlankhaaye wa paapa khwa

aana aya. Na mwinretta vitthu zawaatta nkhamatthiipi.

14 Yinsa khuwaakharipusha theenya atthu apale khuwooza yoori: “Mwikisiileze mooshi na eweleyeneni epi saana yoori: 15 khina etthu moote ya oje wa pinaatamu enraaye nonvira khunthha oharaamu, ila epile zininlankhaaye nroho mwawe ti eninharamushaaye. 16 Nkhama ntthu onaaye mashiilo oosiila ti asiile! 17 Paata ya owaalikha atthu apale olawa owaya, anakhiyoni khunvekela yoori awooze maana a nlikaniso aya opule. 18 Yinsa khuwoozela yoori: ‘Kiri na mweeyo khiniweeleyani? Yoori khina etthu moote eninviraaye pinaatamu eninharamushaaye? 19 Maana khineetta nroho mwawe, ila mwijohojoho mwawe, nawiisha khwiitthiwamo.” Khwa etthiipo mattakhuzi apale, Yinsa khutukhuru ottha wiiya halaali vitthu zoojiwa zooshi. 20 Khurutela olupa yoori: “Etile eninsaruwaaye pinaatamu ti eninharamushaaye. 21 Maana nroho ti, enlakhaamo zawuupuweliwa zootakhala, oshawi akhapa, wiiya, wuula, 22 oraruwa, okhwiririwa, vitthu zootakhala, ohata, oralana woohiyyi wa halaali, nrima, waapa, ojoona na ololo. 23 Zootakhala zooshi zinlankha nroho wa ntthu na piitthiipo zininharamushaaye pinaatamu.”

Waamini wa muukha mmote weeletto

24 Yinsa khulaawo okhule waya khulawa phantte ya Tiirona Sitooni, khweetta nyuupa yaya eto na khaatakiye ojuwiwa ti ntthu,

ila khuhiwahi ojittha sirini. ²⁵ Ila nasaapiru muukha mmote, aarina mwanawe wa nnatti ariina sheethwani, asiiliyeevo monkoni wa ye, khuta khukokhora nshini wa moolu a Yinsa. ²⁶ Muukha otule aari nkereeka ya siiro-fineesiya aavokoliweewo, khusala anvekela Yinsa yoori amwikare sheethwani otule aari mmwiili wa mwanawe. ²⁷ Ila Yinsa khumuuzza yoori: “Owaalikhe khapula aana aje arupale. Khahi yoolotteya othuula phaawu ya aana khuwenkha anapwa.” ²⁸ Muukha otule khujipu yoori: “Khweele, Mbwana aka, ila hatha anapwa, annja tathela vathi wa meeza eniwaakwaayo asimaana. ²⁹ Aphano ye khumuuzza yoori: “Mwaasa wa nanna ojipwiyeezo, weeyo, etta; sheethwani ansaruwa mwanawo.” ³⁰ Muukha otule khurutela owawe na khunsikana mwanawe arapaleliye voolili, sheethwani otule anlikhiye.

Yinsa oninvonisa ntthu woohittakhuli na woohisiili

³¹ Elottelanaka, Yinsa khulankha mmuti mphule wa Tiuro na khulokha Sitooni mpakha ntthatta la Kalileya nti wa Tekapoliishi. ³² Aphano khutiiseliwa mwinyi mmote woohisiili na wookukuma, khunvekela yoori anttheele makhono ye. ³³ Yinsa khunlazavo vakatthi wa athu apale awaatta na khunttha zaala omashiilo wawe. Elottelanaka khutthema na khusapa nlimi la mwinyi aya otule. ³⁴ Aphano khweekesa otulu, khwiittha phumu na khumuuzza mwinyi otule yoori: “Efata” enlupaaye yoori: “Ofunule.” ³⁵ Wakathi otthuupule mashiilo a mwinyi otule khufunuwa na nlimi lawe khuveya, ye khwaaza

ottakhula woohiina tafwawuthi. ³⁶ Yinsa khuwooza yoori ahimuuze hatha ntthu. Ila olikha toowo, khwa nanna aari owaakhattazaavo, yo aari otepa olaleya. ³⁷ Atthu ooshi aari osiilaaye aari wiya ootikinisiwa channu na khusala alupa yoori: “Ye onretta vitthu zooshi saana, mpakha oniwaattakhulisa apale ohittakhuli na owaasiilisa ananhisiili.”

8

Yinsa oniwaajisa alume alufu nne

¹ Ziviriyevo siikhu vattitthiiru, atthu akina awaatta khukusanyeya vamote na Yinsa. Mwaasa wa atthu apale khaarina etthu yoojiwa, khuwaakhuwela anakhiyoni awe khuwooza yoori: ² “Kiniwoonela huruma atthu apa, maana ana siikhu ttatthu ari vamote na miiyo na khana hatha etthu yoojiwa. ³ Amana miiyo kiwooza olawa owaya najala zaya, yo anta okwa ntarikhi maana akina alankha peetiwe. ⁴ Anakhiyoni awe khujipu yoori: “Vayi khwa puuro eti niriiyo ya wiitthaleya ntthu anwahaaye opattha phaawu zoofiyela oja atthu apa?” ⁵ Yinsa khuuzela yoori: “Mweeyo mwina phaawu kavi?” Yo khujipu yoori: “Sapa.” ⁶ Ye khuwaaruma atthu apale yoori eekhale vathi. Elottelanaka khuthuula phaawu epile sapa, khunshukhurwela Nluku, khumeya khuwenkha anakhiyoni awe yoori awawanyele atthu apale. Yo khuretta etthiipile, ⁷ Aarina theenya swi kiina ttiitthittiitthi, khuthuula, khuparikhiya na khuwooza anakhiyoni awe yoori awawanyele atthu apale. ⁸ Atthu apale khuja mpakha orupala. Na khukusanya nyeenye

zaasaliyeyo khwiitaala khelenke sapa. ⁹ Aarivo thamani ya atthu alufu nne, khuleezanana. ¹⁰ Nasaapiru khweetta mmwaatiya na anakhiyoni awe khusala alawa nti wa Talimanuuta.

Mafwarizeewu anveka alama moote

¹¹ Mafwarizeewu khuta na khwaaza omuzela Yinsa yoori amoone, na khunvekela alama ya pinkuuni. ¹² Ye khusisimira nkatthi-nkatthi na khuri: “Mwaasa aya niini khapila eti evekaka alama moote ya minjuza? Miiyo kinhakikhi yoori hatha alama moote khanlawa winkhiwa.” ¹³ Aphano khuwaalikha apale aya, khurutela nkalawa khusala alawa phantte kiina.

Othoweledisana wa mafwarizeewu

¹⁴ Anakhiyoni apale eettiye osahawu othuula phaawu, aarina phaawu moote paasi nkalawa. ¹⁵ Yinsa khuwooza yoori: “Mwijeekelese na mwiiyane phoole na fwaramento za mafwarizeewu na ya Herooti.” ¹⁶ Yo khusala akheetisana araka: “Mwaasa aya woohiina phaawu.” ¹⁷ Yinsa ajuwiyeewo yoori anta okheetisana, khuwoozela yoori: “Mwaasa aya niini mwinkhetisanaka monkoni wa ohiina phaawu? Nalelo khiniweeleyani wala khamwinsiila? Rooho zenu mweetta wuumisa?” ¹⁸ Mweeyo mwinaaye maasho ila Khamwinoona, mwinaaye mashiilo ila khamwinsiila, hatha khamwinfikhiri? ¹⁹ Wakathi opule kaameyiyeeyo phaawu khuwenkha atthu apale alufu thaanu, khelenke kavi za nyeenye zasaliyeyo?” Anakhiyoni apale khujipu yoori: “Khumi na piiri.” ²⁰ Khi wakathi opule kaameyiyeeyo

phaawu sapa yoori kiwenkhe atthu apale alufu nne, zaasaliye khelenke kavi za nyeenye mwaakhupeliyeeyo? Anakhiyoni khujipu yoori sapa. ²¹ Ye khuwooza yoori: “Mweeyo nalelo khiniweeleyani?”

Ovonisiwa wa ntthu woohooni nti wa Betezayi-ita.

²² Aphano yo khufiya Betezayiita, atthu akina ottuukhule khuntanela Yinsa ntthu woohooni, khusala anvekela yoori ansape. ²³ Ye khunthuula ntthu otule khunlawana othetekele wa mmuti mphule, khulawa khutthemela mmaasho na khunttheela makhono. Yinsa khumuuzela yoori: “Weeyo onwahi woona etthu?” ²⁴ Ntthu otule khweekesa otulu khuri: “Kiniwoona atthu anumpuwa nkhamamiitthi enttaaye weettetta. ²⁵ Theenya, Yinsa khunttheela makhono ntthu otule na khufinikha maasho awe. Aphano maasho awe khufunuwa na khurutela woona zooshi saaneene. ²⁶ Yinsa khunruma olawa owawe amuuzaka yoori: “Ohivire mmuti.”

Otukhuru wa Pheeturu

²⁷ Yinsa na anakhiyoni awe khulawa nti waat-tamananiyeeyo Sezareeya ya Filiipe. Ntarikhi eettaka olawa, khusala awoozela yoori: “Atthu anri miiyo ki paani?” ²⁸ Yo khunjipu yoori: “Akina anri weeyo o Yaahaya Namooosa, akina anri o Aliyaasi, akinoko aya anri weeyo om-mote wa manapiyu.” ²⁹ Yinsa khuwoozela yoori: “Khi mweeyo? Mwinri miiyo ki paani?” Pheeturu khujipu yoori: “Weeyo o Al-Masiihu!” ³⁰ Yinsa khuwaaruma yoori ahimuuze hatha nt-thu monkoni wawe ye.

Yinsa onlupa ofwa na osisimuwa wawe

³¹ Aphano ye khusala owaasomisa araka: Mwaana wa Pinaatamu aarina ya ohoochiwa pi vitthu zawaatta na okatthaliwa pi mahaakhimu a tiini na attunkhulu a tiini, anamanozela a kano na ooliwe, ila siikhu ya ttaatthu asisimuwe. ³² Ye khulupa woosileyavo monkoni aya opo. Aphano Pheeturu khunkhuwelela othetekele khusala anshowera. ³³ Yinsa khurutela aphale aariivo anakhiyoni awe khusala aweekesa na khunshowera Pheeturu yoori: “Osale nyuma waka, Sheethwani! Weeyo khunuupuwela vitthu za Nluku, ila vitthu za eenaatamu. ³⁴ Aphano khuwaakhuwela atthu na anakhiyoni awe khuwooza yoori: “Nkhama ntthu ontakha okilotta, ajikatthale mweenyewe, athuule nsalapa awe akilotte. ³⁵ Maana otule antakhaaye wuusuru ohaayi awe ontta omwaashikha, ila otule onimwaashikhaaye ohaayi awe, mwaasa wa miiyo na mwaasa wa hapari zooshapweya ontta wuusurukha. ³⁶ Ena fwayita-ni ntthu oshintta olumwenku wooshi, mwiisho waya khumwaashikha nafusi yawe? ³⁷ Ama niini ntthu anwahaaye opatili na nafusi yawe? ³⁸ Amana ntthu apatthiwa haaya khwa miiyo na mattakhuzi aka khwa khapila epi zoovonya na za twampi, Mwaana wa Pinaatamu onteela opatthiwa haaya khwa otu aya wakathi anttelaaye ota nsiifwa wa Papaawe na malayikha ttakatthiifu.”

9

¹ Khusala alupa theenya yoori: “Kiniwuuzani khweele yoori: Khwa apa ariiye apha, akina

khanfwa ahooneeni ofwalume wa Nluku otakha na owahi.”

Yinsa, Munsa na Eliyaasi

² Ziviriyevo siikhu sitha, Yinsa khunthuula Pheeturu, Tiyaaku na Yaahaya paasi, khuwaalawana vamwaako woolepa woohiivo hatha ntthu nkina. Attaaphale Yinsa khwiiya wozukulisiwa ettaka omoona. ³ Kuwo zawe khwiiya zoottakattha nkhamama etthu yawaara ameenaatho ahinwahaaye ofula khuttakatthisa nkhamama toowo. ⁴ Khuwaapuwelela Aliyaasi na Munsa, khusala attakhulana Yinsa. ⁵ Aphano Pheeturu khumuuzza Yinsa yoori: “Mwaaliimu ti yooshapweya wiikhala attaapha. Nintta ojeka heema ttatthu, moote yawo, moote ya Munsa na kiina ya Aliyaasi.” ⁶ Pheeturu khaari ojuwa etthu yoolupa, maana yo aari wa woova. ⁷ Elottelanaka khupuwa liwiku khuwaakhutela, na khusiileya huula yaari oraaye: “Otu Mwanaka wompheta waka; mwinsiileze”. ⁸ Nasaapiru, wakathi eekesiyeeyo nkerekhere, khuhimooni hatha ntthu nkina theenya woohiivi Yinsa. ⁹ Eettaka wiishukha vamwaako aphale, Yinsa khuwooza yoori ahimuuze hatha ntthu etile oniyeeyo, mpakha Mwaana wa Pinaatamu asisimuwe muufwa. ¹⁰ Mwaasa opule khuthokorela atthaaporu paasi, kusalana okeetisana maana a “osisimuwa muufwa”. ¹¹ Khumuuzela yoori: “Mwaasa wa niini, anamanozela a kano alupaka wiiya yoohithajiya Aliyaasi ota khapula?” ¹² Yinsa khuwaajipu yoori: “Khweele Aliyaasi ona ya ota khapula, amana ata onrutisela opheeya vitthu zooshi. Khi mwaasa aya niini yaatikhiwaka

yoori Mwaana wa Pinaatamu ona ya ohoowa channu, okatthaliwa na otarawiwa? ¹³ Ila, miiyo kiniwuuzani yoori Aliyaasi ata, yo khunrettela zooshi aatakiyeeyo nkhamama zaatikhiweezo monkoni wa ye”.

Ovonisiwa wa shapu aariina sheethwani

¹⁴ Wakathi afiyevo aphale aariivo anakhiyoni apale akina, khoona khuntti khuluyeene ewaazukuleliye apale na anamanozela a kano eettaka okheetisana na anakhiyoni. ¹⁵ Atthu apale paata ya omoona Yinsa, khwiiya ooshanka khutthirela khunchelisa. ¹⁶ Yinsa khuwoozela yoori: “Mwinkhetisana niini?” ¹⁷ Mwinyi mmote aari vakatthi wa khuntti etile khujipu yoori: “Mwaaliimu, miiyo kootisela mwanaka ariina sheethwani aninkhattazaaye ottakhula. ¹⁸ Wakhula vahali aninsikanaavo, ontta onkwisela vathi. Khusala alaza maphovu na owina meeno, na wookowa. Kawaavekela anakhiyoni awo yoori amwiikare sheethwani aya oto, ila yo khuhinkhitiri. ¹⁹ Aphano Yinsa khujipu yoori: “Oo, atthu oohaamini, mpakha lini kiiyaka vamote na mweeyo? Mpakha lini kuuvilelakani? Mwikitiisele shapu oto.” ²⁰ Aphano yo khuntiisa. Wakathi sheethwani amooniyevo Yinsa, nasaapiru khunthothela mwaana otule ozoromowa woohusutivo khukwela vathi, khwaaza ojuupurusha alazaka maphovu. ²¹ Yinsa khumuuzela paapa wa mwaana otule yoori: “Zamwaaza lini epi?” Papaawe mwaana khujipu yoori: “Thanku avokoliwe. ²² Swaafu zawaatta, sheethwani oto, ontta onkwisela vamoontho na mmaati yoori amuule. Ila nkhamama onwahi oretta

etthu, noonele huruma onaawuni.” ²³ “Onwahi?” Alupaka Yinsa. “Zooshi zinwaheya khwa otule ankhupalaaye.” ²⁴ Nasaapiru paapa wa mwaana otule khunyakula araka: “Kinkhupali; okaawuni muuhikhupali mwaka!” ²⁵ Wakathi Yinsa ooniyevo yoori khuntti khuluyeene yeetaka okusanyeya, khunsukisa sheethwani araka: “Sheethwani woohittakhuli na ohisiili, miiyo kinuuruma yoori onlikhe na ohinrutele theenya.” ²⁶ Sheethwani khunyakula, khunsakhinya woohusutivo khusaruwa, shapu khwiiya nkhama ntthu woofwa, khufiyelela atthu akina olupa yoori: “Afw.” ²⁷ Ila Yinsa khunkhola nkono awe khunlansa, na khwiiya wa weemela. ²⁸ Paata ya Yinsa orutela owawe, anakhiyoni awe khumuuzela othetekele yoori: “Mwaasa aya niini nahaakhitireliyeeyo omwiikara?” ²⁹ Ye khuwaajipu yoori: “Eto oniikareya khwa lompa na ofuka paasi.”

Yinsa onlupa theenya ofwa wawe na osisimuwa wawe

³⁰ Yo khulaawo okhule aariiwo na khulokhela Kalileya. Yinsa khaatakiye atthu ojuwa ohali aariiwo, ³¹ maana etta owaasomisa anakhiyoni awe na awoozaka yoori: “Mwaana wa Pinaatamu onsaleela winkheleliwa mmakhono wa anaatamu. Yo anlawa amuule, ila siikhu ya ttaatthu onlawa asisimuwe.” ³² Ila yo khayaaweleyiye etthu aari otakhaaye olupa na etta woova omuuzela.

Nwulu muufwalume wa pinkuuni

³³ Khufiya Kafwaranaawu. Ari owawe, ye khuwoozela anakhiyoni awe yoori: “Ntarikhi

mwaari okheetisana niini?” ³⁴ Ila yo khuhilupi hatha etthu, maana aari onyakulisana yoori anjuwe paani eeyiyeeyo nwulweene channu vakathi vaya. ³⁵ Eekhaliyeeyo, Yinsa khuwaakhuwela apale khumi na awiri khuwooza yoori: “Nkhama ntthu ontakha wiiya wa mwanzo, ona ya wiiya wawiishela na eeye karumeya wa ooshi.” ³⁶ Khunthuula mwaana mmote khunttha vakatthi vaya, khunkholela nkhoona awe na khuwooza yoori: ³⁷ “Wakhula otule animpwekherelaaye nsimaana nkhamu otu, khwa nzina laka, onikipwekherela miiyo, na otule anikipwekherelaaye khanikipwekherela miiyo, ila onimpwekherela otule akiperekhiyeeyo.

Otule ahiniiphiriwaaye ti fweeyo ori khwa fweeyo

³⁸ Yaahaya khunkhuwela Yinsa khumuuzwa yoori: “Mwaaliimu, namoona mwinyi mmote eekaraka masheethwani khwa nzina lawo, fweeyo khunlikhisa mwaasa woohiyyi wa khuntti yeetthu.” ³⁹ Yinsa khumuuzwa yoori: “Mwihinkhattaze, maana khina anrettaaye minjuza khwa nzina laka, elottelanaka khukittakhula wootakhalavo. ⁴⁰ Maana otule ahiniiphiriwaaye ti fweeyo, ori khwa fweeyo. ⁴¹ Nakatalikha, kiniwuuzani khweele yoori: Otule aniwinkhaanini maati oonywa, koopho moote khwa nzina laka, mwaasa wa mweeyo wiiya atthu a Al-Masiihu, weekhweele khinteela omwaashikha phakari yawe.

Okwiselana ntwampi

42 “Amana ntthu ankwisa mmote wa apa attiitthi akikhupaliyeeyo miiyo, afwataali weeseleliwa mpahari afukeliwe liwe liwululene mmwisiko. 43 Na nkhono awo amana wuukosisa, oshije. Afwataali weetta muuhaayi ori woorakala, ehiiyeeni wiiyana makhono awo mawiri khweetta motthooni, ohali oriwo moottho ohinzimaaye. 44 [Ottuukho nyunku yaya ehinfwaaye wala moottho aya ohinzimaaye.] 45 Na muulu awo amana wuuthoweelisa, oshije. Afwataali weetta muuhaayi ori woorakala, ehiiyeeni wiiyana moolu mawiri khweetta motthooni, 46 [ottuukho nyunku yaya ehinfwaaye na moottho aya ohinzimaaye.] 47 Na amana liisho lawo limote luuthoweelisa, olazemo. Afwataali weetta muufwalume wa Nluku na liisho limote paasi ehiiyeeni wiiyana oomawiri ila khweeseleliwa motthooni, 48 ottuukho nyunku yaya ehinifwaaye na moottho aya ohinzimaaye. 49 Maana wakhula mmote onlawa alukaniwe moottho. 50 Mwiinyu pi wooshapweya; ila mwiinyu aya amana olikha onyuunya, wala khunrutiseleya! Mwiiye mwiinyu mweeyo ena, na mwiikhale na heeri mmote na nzeenu.”

10

Monkoni wa waashana

1 Aphano Yinsa khulaavo aphale vaya khusala alawa nti wa Yudeya na phantte kiina ya Yorotaani. Theenya khuntti moote khuta aphale aariivo. Nkhama etthiipo aazowereliyeezo khusala awaasomisa. 2 Mafwarizeewu akina khunsusela yoori amweeze amuuzelaka yoori:

“Halaali nlume omwaasha muukha awe?”
³ Ye khuwaajipu yoori: “Munsa aruma niini?”
⁴ Yo khulupa yoori: “Munsa aninkha ruhusa ya waatikha talakha khumwiikara.”
⁵ Yinsa awaajipwaka khuri: Mwaasa wa wuuma rooho, tiito ye oolikheliyeeni oruma opo aatikhiyeeyo.
⁶ Ila Nluku omwanzo amumpa nlume na muukha.
⁷ Mwaasa wa ethiito, nlume oninlikha papaawe na mamaawe khujikusanya na muukhaawe,
⁸ na oowiiri anretteya wiiya mwiili mmote paasi. Toowo, yo khaniiya awiri, ila oniiya mwiili mmote.
⁹ Nakatalikha, etile Nluku akusanyiyeeyo, ahiiyevo anvalulaaye.”
¹⁰ Wakathi Yinsa ari owawe, anakhiyoni awe khumuuzela theenya monkoni wa mattakhuzi atthaapale.
¹¹ Ye khuwaajipu yoori: “Wakhula otule animwaashaaye muukhaawe na khunrala muukha nkina, ontta oraruwa.
¹² Muukha naye amana antthira mannawe khuraliwa ti nlume nkina, ontta oraruwa”.

Yinsa na asimaana

¹³ Atthu akina aari owaatana asimaana yoori asapiwe ti Yinsa, ila anakhiyoni awe eetta owaashoweraka.
¹⁴ Yinsa paata ya woona vitthu epile, khuhintuveli na khuwooza yoori: “Mwiwaalikhe asimaana akiteele miiyo, mwihwaakhattaze; maana ofwalume wa Nluku pi waya.
¹⁵ Kiniwuuzani khweele yoori: Otule ahimpwekherelaaye ofwalume wa Nluku nkhamana nsimaana, khanteela weettamo.
¹⁶ Elottelanaka, khuwaathuula asimaana, khuwaattheela makhono na khuwaaparikhia.

Shapu thajiri

17 Wakathi Yinsa aari weettelaaye osaruwa, mwinyi mmote khutthira amweettelaka khulawa khunkokhorela na khumuuzela yoori: “Mwaaliimu woosaana, kiretteniini yoori kipatthe ohaayi wa mileele?” 18 Yinsa khunjipu yoori: “Mwaasa aya niini okiitthaka woosaana? Khaavo woosaana, woohiyyi mmote paasi Nluku. 19 Weeyo onjuwa oruma onraaye: ‘Ohuule, ohiraruwe, ohiiye, Ohilupe oshaahiti woovonyeya, ohinhate ntthu na onshitahi papaawo na mamaawo.’” 20 Mwinyi otule khulupa yoori: “Mwaaliimu, zooshi epo kinshututela thanku oshaapu aka.” 21 Yinsa khumweekesa na khumpheta. Khumuuzela yoori: “Enuusaleela etthu moote. Olawe woozanyise vitthu zawo zooshi, nzurukhu aya owenkhe asikhini na weeyo onta wiiyana njuju pinkuuni; nawiisha ote okilotte.” 22 Paata ya mattakhuzi apale, shapu otule khwiiya woottettheya khulaavo ari woohuzunikha, maana aarina maali zawaatta.

23 Yinsa khweekesa nkerekhere khuwooza anakhiyoni awe yoori: “Nanna enlipaazo thaajiri weetta muufwalume wa Nluku.” 24 Anakhiyoni awe khwiiya ooshanka khwa mattakhuzi apale. Ila Yinsa khurutela olupa theenya yoori: “Aanaaka, nanna enlipaazo weetta muufwalume wa Nluku! 25 Eniyya yookhweya Enkamiya ovira valiphotto la sikano, zayita thajiri weetta muufwalume wa Nluku.” 26 Anakhiyoni awe khwiiya ooshanka, khusala oozelana mmote na nzaawe yoori: “Nkhama pi toowo, paani anttelaaye wuusurukha?” 27 Yinsa khuweekesa

khuwooza yoori: “Khwa pinaatamu khinwaheya, ila Nluku wala; khwa Nluku vitthu zooshi zinwaheya.” ²⁸ Aphano Pheeturu khwaaza omuuzo yoori: “Fweeyo nalikha zooshi yoori nuulotte.” ²⁹ Yinsa khujipu araka: “Kiniwuuzani khweele yoori: khaavo anlikhaaye vaje vawe, ttwiiye, nlupuwe, mamaawe, papaawe, aana awe ama mashapa awe, mwaasa wa miiyo na hapari zooshapweya, ³⁰ ahipwekheraaye venkivene ohaayi otthuupu, swaafu miiya theenya ya manyupa, attwi, alupu, maama, paapa, aana ama mashapa na olupatthiwa. Mwiisho waya ohaayi wa mileele. ³¹ Awaatta eeyiye amwanzo, anttela wiishela; na awiishela anttela wiiya amwanzo.”

Yinsa onrutela olupa ofwa wawe na osisimuwa wawe

³² Yo eetta owelela Yeruzaleemu, Yinsa khuwaalokoza. Anakhiyoni khwiiya onshanka, na apale aari onlottaaye khwiiya awoova. Theenya Yinsa khuwaakhuwela apale khumi na awiri na khuwooza vitthu zaari weettelaaye onrettikhanela araka: ³³ “Moone, fweeyo ninwelela Yeruzaleemu, mwaana wa pinaatamu onlawa enkheleliwe mahaakhimu a tiini na anamanozela a kano. Yo anttela onhukhumwela ofwa na omwinkhelela mmakhono wa amalapo, ³⁴ anttela onveyisa, onthemela, onjapha na amuule. Paata ya siikhu ya ttatthu asisimuwe.”

Oveka wa Tiyaaku na Yaahaya

³⁵ Aphano Tiyaaku na Yaahaya, aana a Zepeteewu, khumwaattama Yinsa khumuuzo yoori: “Mwaaliimu, nintakha yoori oninkhe etthu

ninttelaaye wuuvekela.” ³⁶ Yinsa khuwoozela yoori: “Mwintakha yoori kuuretteleni niini?” ³⁷ Khujipu yoori: “Oninkhe ruhusa yoori khwa nsiifwa mwawo, fweeyo neekhale mmote nkhone nlume mmote nkhone nkha.” ³⁸ Ila Yinsa khuwoozela yoori: “Khamwinjuwa etthu mwinvekaaye. Mwinwahi mweeyo onywela koopfo etile kinyweliyeeyo ama opwekherela woosiwa opu khoosiweeyo miyo?” ³⁹ Yo Khujipu yoori: “Ninwahi.” Yinsa khuwoozela yoori: “Mweeyo mwinlawa mwanywele koopfo kinyweliyeeyo na mwinlawa moosiwe nkhamo khoosiweeyo miyo; ⁴⁰ ila phantte eto ya wiikhala nkhone nlume aka ama nkhone nkha khahi miyo kininkhaaye. Maana puuro yaya eto ti ya apale oothokoreliwa.” ⁴¹ Noosiila vitthu epile, apale khumi khwiya ookasirikha khwa Yaahaya na Tiyaaku. ⁴² Ila Yinsa khuwaakhuwela khwiya vamote naye, khuwoozela yoori: “Mweeyo mwinjuwa yoori apale aninkhiwaaye ofwalume wa olokozela khapila anshintta na owahi ariinaaye. ⁴³ Ila vakatthi venu mweeyo ehiye toowo. Otule antakhaaye wiya nntunkhulu vakatthi venu mweeyo ona ya wiya othuuto anrumeyaaye; ⁴⁴ otule antakhaaye wiya wa mwanzo vakatthi venu eeye namarumeya enu mooshi mweeyo. ⁴⁵ Maana Mwaana wa pinaatamu khateleeni orumeyeliwa, ila orumeya na winkha ohaayi awe khwa owaakaphula atthu awaatta.

Ovonisiwa wa ntthu woohooni wa Yeriko

⁴⁶ Khweetta Yeriko. Wakathi Yinsa na anakhiyoni awe vamote na khunti khuluyeene

yaari olankhaaye Yeriko Baritimeewu woohooni mwaana wa Timeewu nazimola eettiye wiikhala kharipu ya tarikhi. ⁴⁷ Noosiila yoori Yinsa wa Nazareeti ontta ovira, khwaaza okhuwa araka: “Yinsa, mwaana wa Daawuuda, koonene huruma!” ⁴⁸ Atthu awaatta khusala anshowera yoori eeye woonyamala, ila ye khusala akhanyarela araka: “Mwaana wa Daawuuda, koonene huruma!” ⁴⁹ Yinsa khweemela khuri: “Mwinkhuwele.” Khukhuweliwa otule woohooni khumuuzela yoori: “Ofurahi, olankhe, Ye ontta wuukhuwela!” ⁵⁰ Khweesela ajapi yawe toole, khwiirukha khweemela khulawa aphale aariivo Yinsa. ⁵¹ Yinsa khumuuzela yoori: “Ontakha yoori miiyo kuurettele niini?” Mwinyi otule woohooni khujipu yoori: “Mwaaliimu, miiyo kintakha wona!” ⁵² Yinsa khumuuzela yoori: “Olawe! Amini yawo yawuusuru.” Nasaapiru khwaaza wona na khusala anlotta Yinsa ntarikhi mphule.

11

Yinsa onvira na oshintta Yeruzaleemu

¹ Wakathi aattameliyevo Yeruzaleemu, khufiya Betifwaaje na Betaaniya, kharipu ya mwaako wa oluveera, Yinsa khuwaaruma anakhiyoni awe awiri, ² khuwooza yoori: “Mwilawe mmuti mpho mwaattameliyeemo, mwifiyaka mwininsikana mwaana wa puuru afukiwe ahinaweliweke ti hatha ntthu. Mwinfukule mwintiise. ³ Amana apuwa ntthu awuuzelani yoori: ‘Mwaasa niini mwirettaka vitthu epo?’ Mwinjipu yoori: ‘Mbwana ontta onhithajiya na oninrutisa nasaapi.’ ” ⁴ Yo khulawa

khunsikana mwaana wa puuru afukeleliwe, vanlako nwulu wa ntarikhi ya vaje, anfukulaka. ⁵ Atthu aari attaaphale khuwoozela araka: “Eto mwinrettaaye niini ya onfukula mwaana wa puuru oto?” ⁶ Anakhiyoni apale khujipu etthiipile Yinsa awoozyeeyo, na ye khuwaalikha olawana. ⁷ Khuntiisela mwaana wa puuru otule Yinsa, khutthaavo kuwo zawe na khuwela. ⁸ Atthu awaatta khusala attattikha kuwo zaya ntarikhi na akina khusala atthaamo virapi aashijiyeeyo ntthuttu. ⁹ Apale aalokoziyeeyo na apale aari onlottaaye khusala anyakula araka: “Hosaana!” Wooparikhiyiwa ti otule antaaye khwa nzina la Mbwana!” ¹⁰ Wooparikhiyiwa saana ofwalume ontaaye wa papeetthu Daawuuda!” Hosaana pinkuuni!” ¹¹ Yinsa khufiya Yeruzaleemu na khulawa mpakha nnyupa woosifwiwamo. Khoona zooshi na wiiya waaripiye, khulawa Betaaniya na anakhiyoni awe apale khumi na awiri.

Yinsa ontwaharesha nyuupa yoosifwiwamo

¹² Mmeesho mwaya, wakathi aari olankhaaye Betaaniya, Yinsa khunkhola jala. ¹³ Ari peetiwenene, khoona muutthi wa mfikeera wooripelela mathapa, khulawa wona nkhamama aari osikanamo nshumo. Wakathi aattameliyeeyo, kuhisikanimu hatha etthu, woohiiyi mathapa, maana khawaari wakathi wa wiima fiiku. ¹⁴ Aphano khuuza mfikeera opule yoori: “Khina anttelaaye oja theenya mishumo khwa weeyo.” Anakhiyoni awe khusiila alupaka mattakhuzi apale. ¹⁵ Yinsa khufiya

Yeruzaleemu, khuvira nnyupa woosifwiwamo na khwaaza oweekara apale aari wuuzanyisaaye na apale aari wuuzanyaaye. Khupwalula khukulu za anamapatilisa nzurukhu na za apale aari wuuzanyisaaye jiwa. ¹⁶ Khaari ontakhela ntthu oviranamo etthu yawuuzanyisa nnyupa woosifwiwamo. ¹⁷ Khusala asomisa araka: “Khayaatikhiweeni yoori: ‘Nyuupa yaka enttela wiiya nyuupa yoolompiwamo khwa atthu ooshi ila mweeyo mwarettisa wiiya likurakuza la manantarawu.’” ¹⁸ Mahaakhimu a tiini na anamanozela a kano khusiila mattakhuzi apale na khwaaza weekesa nanna ya omuula, maana eetta omoova, mwaasa wa khuntti khuluyeene yaari oshankisiwa pi masomi awe. ¹⁹ Weettelaka oripa, yo khulaamo nsitati mphule.

Mfikeera wa wuuma

²⁰ Mmeesho mwaya supuyeene, khoona mfikeera opule ori wawuuma mpakha na mitathaari zaya. ²¹ Pheeturu khuupuwela na khumuuzza Yinsa yoori: “Mwaaliimu! Woone mfikeera opule waalaaniyeeyo wooma.” ²² Yinsa khunjipu yoori: “Wiiyane amini khwa Nluku. ²³ Miiyo kiniwuzani khweele yoori, wakhula otule anttelaaye wuuzza mwaako opu yoori: ‘Okhuleyevo apha waajeeselele mpahari,’ na khuhiina hatha nshikili nroho mwawo, ila khukhupalela yoori enretikhana etile olupiyeeyo, entta oretteya. ²⁴ Apho, miiyo kiniwuzza yoori, zooshi weeyo onvekaazo khwa lompaa, khukhupalela yoori apwekherela, onteela opattha. ²⁵ Na amana olompaka, khwi-yana nzaawo okosiyeeyo, onswaamihi, yoori

naye Paapa wa pinkuuni oswaamihi twampi zawo. ²⁶ Ila mweeyo amana mwihiswaamihi, na mweeyo Paapa wa pinkuuni khanswaamihi twampi zenu.

Ofwalume wa Yinsa na woosa wa Yaahaya

²⁷ Khufiya theenya Yeruzaleemu, wakathi Yinsa aari oviraaye nnyupa woosifwiwamo, khususeliwa ti mahaakhimu a tiini, anamanozela a kano na attunkhulu a tiini, ²⁸ khusala amuuzela yoori: “Vitthu epi, onrettana ofwalume waani? Paani awinkhiyeeyo ofwalume wa orettana?” ²⁹ Yinsa khujipu yoori: “Miiyo kintakha kiwuuzele, amana okijipu, kintta owuuzza ofwalume kinrettanaaye vitthu epi. ³⁰ Nkakuuze, woosa wa Yaahaya waari wa pinkuuni ama waari wa anaatamu?” ³¹ Yo khusala anyakulisana araka: “Amana niri ‘ti-ya pinkuuni,’ onta onuuzela yoori: ‘Aphano mwaasa aya niini mwihinkhupalelaka?’ ³² Ila nihijilipisane olupa yoori waari wa atthu!” Maana yo aari owoova atthu, weekhweele atthu aari ookhupali yoori Yaahaya aari napiyu. ³³ Aphano khunjipu Yinsa araka: “Khanijuweeni.” Yinsa zwaamu yawe khujipu yoori: “Hatha vattitthiiru, miiyo akiniwuuzani owahi kinrettanaaye vitthu epi.”

12

Nlikaniso wa anamalima

¹ Aphano Yinsa khwaaza ottakhula na milikaniso yoori: “Mwinyi mmote khuzala miitthi za wuuva, khujekelela khwiiya nkatthi, khuthipa kulaathayini yoori asala atthaamo

wuuva na khujeka korofwa. Paata ya toole khurentteriwa anamalima ye khusaafiri. ² Wakathi wa wuurula, khunruma karumeya awe khwa anamalima yoori enkhiwe phantte ya mishumo za wuuva. ³ Ila yo khunkhola khumpiya na khumwiikara woohimwinkhi etthu. ⁴ Aphano khumperekha karumeya awe nkina yo khunvonya khunwozola veeshwa, na khunttukhana. ⁵ Khumperekha theenya nkina khumuula. Khuwaaperekha theenya awaatta akina; khupiiwa na akina khuuliiwa. ⁶ Aari osala mmote yoori amperekhe, mwanawe wompheta wawe. Mwiisho waya khumperekha na khuri: ‘Otu mwanaka antta onshitahi.’ ⁷ Ila anamalima apale khuuzana yoori: ‘Otu ti namarithi. Nlaweni nimuule, nirithi fweeyo.’ ⁸ Aphano khunkhola mwaana otule, khumuula khumweeselela oje wa nshapa. ⁹ Yinsa khuuzela yoori: “Mweenyewe nshapa ontela owaarettela niini? Ye ontta ota awoole anamalima apale nshapa laya awenkhe anamalima akina. ¹⁰ Khamwinasome etthu enlupaaye zawaatikhiwa ttakatthiifu? ‘Liwe anamajeka akatthaliyeeyo, nttho laya laretteya wiiya liwe linkhomaazaaye! ¹¹ Eto enlankha wa Mbwana na ti yootikinisa khwa fweeyo.’” ¹² Aphano khwaaza weekesa nanna ya onkhola, maana eettiye ojuwa yoori nlikaniso opule aalupiyeeeyo waari owaalupa yo. Ila eetta owoova atthu, attaaphale khunlikha khusala alawa safwari yaya.

Oriphiwa lumpuru

13 Paata ya toole, khurumiwa mafwarizeewu akina na attunkhulu akina a khuntti ya Herooti olawa ottakhulana Yinsa eekesaka yoori ansikanane nttakhuzi loovonyeya. 14 Wakathi afiyeevo aphale aariivo Yinsa khulupa yoori: “Mwaaliimu, ninjuwa yoori o weekhweele na khunjilikha oshawurisiwa ti ntthu. Maana khuniwaaphuka atthu khwa nanna ariizo, ila onsomisa wawaamineyavo tarikhi ya Nluku. Nkanuuzo: Halaali onripha lumpuru Seezari ama wala? 15 Ila Yinsa khumweeleya onaafikhi waya khuwoozela yoori: “Mwaasa aya niini mweeyo mwikootootaka? Mwikitiisele nzurukhu yoori moone.” 16 Yo khutana nzurukhu opule, ye khuwoozela yoori: “Ratarato eti na waatikha opu pi waani?” Khujipuza yoori: “Seezari.” 17 Aphano Yinsa khuri: “Mwimwinkhe Seezari etile yiyiye ya Seezari, na ya Nluku etile yiyiye ya Nluku.” Khwiiya onshankela.

Osisimuwa khweele

18 Masatukhi akina, apale anlupaaye yoori khawiivo osisimuwa, khuta aphale aariivo Yinsa khulupa yoori: 19 “Mwaaliimu, Munsa anilikhela zawaatikhiwa yoori, amana afwa ttwi na khunlikha muukhaawe ahinvokoleleeni aana, alooziwe ttwiye yoori epuwe peewu khwa zwaamu ya ttwiye. 20 Moone, aarivo attwi sapa, otu wa mwanzo khuloola na khufwa ahiwaalikheeni hatha aana. 21 Waphiiri khulooziwa muukha otule aafweliweeyo ti mannawe na ye khufwa, woohinlikhi mwaana; na wattaatthu khwiiya etthiipo.

22 Etthiipile oosaapa khuhiwaalikhi hatha aana. Mwiisho waya muukha otule na ye khufwa.
 23 Wakathi woosisimuwa, khwa ooshi apa sapa anttelaaye wiiya muukhawe tuuvi? Maana ooshi anrala!” 24 Yinsa khuwaajipu yoori: “Mweeyo mwattettekhiwa, maana khamwinjuwa zawaatikhiwa ttakatthiifu wala owahi wa Nluku! 25 Pi toono, wakathi woosisimuwa muufwa, khamwinlawa oloola, wala oloozuwa, ila mwinttela wiiya nkhamama malayikha a pinkuuni.
 26 Mweeyo khamwina some nkithaapu ya Munsa etthu yaatikhiweeyo monkoni wa osisimuwa? Wakathi aari ottakhulaaye va muutthi opule waari okholelaaye, yaatikhiwa yoori Nluku aamuuziye Munsa yoori: “Miiyo ki Nluku wa Eburahiima, wa Esiyaakha na wa Yaakhumpa.”
 27 Moone, Nluku khahiyo wa ananfwa, ila Nluku wa atthu haayi. Mwattettekheya venkivene.

Oruma nwulu

28 Namanozela wa kano mmote noowasiila akheetisanaka khunsusela, ajuwiyeevo yoori ajipu saana, khumuuzela yoori: “Khi oruma wamwanzo khwa zooshi pi puuvi?” 29 Yinsa khujipu yoori: “Oruma wamwanzo khwa zooshi pi opu: Osileze, Ezirayiilu, Mbwana Nluku eetthu ti eeyiye Mbwana otthwe paasi. 30 Omphete paasi Mbwana Nluku awo khwa rooho yawo yooshi na nafusi yawo yooshi na akhili zawo zooshi na kuvu zawo zooshi. 31 Waphiiri pi opu: ‘Omphete nzaawo nkhamama etthiipo onjiphetaazo omweenyewe. “Khawiiwo nrumo nkina nwulu nkhamama opu.’ 32 Namanozela wa kano otule khuri: “Kemaani, Mwaaliimu, walupa

na haakhi yoori ye mmote paasi, na khaavo nkina woohiyyi ye, ³³ na omphete na rooho yawo yooshi na akhili zawo na kuvu zawo zooshi na omphete nzaawo nkhamo etthiipo onjiphetaazo ti yooziti zaakha yoolukuziwa na twaha. ³⁴ Yinsa amooniyeewo yoori ajipu waakhilivo, khumuuzo yoori: “Weeyo khuri peetiweene na ofwalume wa Nluku.” Elottelanaka, khuhiivo hatha mmote aari omuuzelaaye.

Al-Masiihu Mbwana wa Daawuuda

³⁵ Yinsa eettaka osomisa nnyupa ya Nluku, khuwoozela yoori: “Anlupa toovi anamanozela kano yoori Al-Masiihu mwaana wa Daawuuda?

³⁶ Daawuuda aya alupa khwa Rooho Ttakatthiifu yoori: ‘Mbwana amuuzo Mbwana aka yoori wiikhale nkhoono nlume aka, mpakha miyyo kiwaatthe maatuwi awo vathi wa moolu awo.’

³⁷ Daawuuda aya onimwiittha yoori ‘Mbwana’. Toovi anttelaaye wiyya mwaanawe?” Khuntti khuluyeene yaari osiileza wootuveliwavo.

³⁸ Yinsa eettaka owaasomisa, aari owooza yoori: “Phoole na anamanozela kano. Yo oniwaatuvela weettetta awaliye ajapi zoolepa na opwekherela mwacheliwa vaparasa, ³⁹ owaatuvela wiikhala wiilokozi nsinakooka na puuro zooshitahiwa mmajampo, ⁴⁰ atthaapo antapanya mmanyupa ananfweeliwa pi amannazaya na ojihakikhi khwa oretta lompa zoolepa; apa aya anttela ohoowa khwa ophukiwa woolwaazavo!”

⁴¹ Yinsa eekhaliye waattamela puuro etile eninkhiwaavo zaakha, aari woona nanna khuntti etile yaari otthaamo nzurukhu n'yoopo ya zaakha. Mathaajiri awaatta aari otthaamo

wawaatta. ⁴² Khumoona muukha namafweliwa ti mannawe mmote wa masikhini, atthaakamo ttoosu piiri. ⁴³ Yinsa khuwaakhuwela anakhiyoni awe khusala awooza yoori: “Kiniwuuzani khweele yoori namafweliwa otu ti mannawe atthaamo n'yoopo wa zaakha zayita akina aya. ⁴⁴ Maana ooshi enkha tathela, ila otu na osikhini awe enkha wooshi aari ororomelaaye.

13

Yinsa onlupa opwechiwa wa Nyuupa Yoosifwiwamo

¹ Wakathi Yinsa aari osaruwaavo nnyupa yoosifwiwamo, nakhiyoni awe mmote khumuuzza yoori: “Mwaaliimu nkoona! Maweni mawulweene toono na manyupa ooshapweyisana toono!” ² Yinsa khunjipu yoori: “Woonna manyupa mawulumawulu apa? Khalinlawa liwe wiiya vatulu wa liwe nzaaya lihinttelaaye opwechiwa.”

Alama ya mwiisho wa wakathi

³ Yinsa aarettiye eekhaliye vamwaako Oluveera omaasho wa nyuupa yoosifwiwamo, Pheeturu, Yaakhumpa, Yaahaya na Antere khumuuzela othetekele yoori: ⁴ “Onuuzze, wakathi-ni enttelaaye orettikhana vitthu zaya epo, na enttela wiiyavo alama-ni yoothoonyeza yoori zooshi zasaleela orettikhana?” ⁵ Yinsa khuwooza yoori: “Phoole yoori mwihihatiwe ti hatha ntthu. ⁶ Maana awaatta anta khwa nzina laka alupaka yoori: ‘Miiyo ki Al-Masiihu!’ na aniwaahata atthu awaatta. ⁷ Amana mwisiila viittha ama hapari za viittha, mwihooove maana epo ena zoorettikhana,

ila nalelo kinttela wiiya mwiisho. ⁸ Khapila moote enlawa yoomanane khapila kiina, na ofwalume onlawa woomanane ofwalume nkina. Zinlawa zeeyevo visikinyaatthi khwa phantte zoofwarikhana na jala. Epo zaya yaazo ya vitthu za olwaaza. ⁹ Mweeyo mwiiyane phoole, maana mwinlawa mwenkheleliwe wa anamaphuka na mwinlawa mwajaphiwe mmasinakooka, na mwilawaniwe wa misatoro na wa afwalume, mwaasa wa miiyo, yoori mwiiye mashaahiti. ¹⁰ Ila enihithajiya olaleyiwa hapari zooshapweya khapula khwa khapila zooshi. ¹¹ Amana mwithuuliwa olawa ofukiwa na ophukiwa, mwihishukulikhe etthu yoolupa, ila ethiito mwinttelaaye winkhiwa wakathi aya otthuupo mwilupe ethiito, maana khahiyo mweeyo mwinttakhulaaye, ila Rooho Ttakatthiifu. ¹² Ttwi mmote onlawa anleve ttwiiye yoori ooliwe, na paapa onleva mwanawe. Aana anlawa awaazukuluwele apapa zaya awoole. ¹³ Atthu ooshi anttela owiinani mwaasa wa miiyo. Ila otule anttelaaye ovilela mpakha mwiisho, ontta wuusurukha.

Ohoowa nwulweene

¹⁴ Amana moona okufuru wa woopisa wa pala nhali woohifwayi wiiyamo (ansomaaye ti emweeleye), aphanu apale anttelaaye wiiya Yudeya atthirele omwaako. ¹⁵ Otule anttelaaye wiiya vatulu wa nyuupa ahiishukhevo yoori alawe owawe, wala ahivire othuula etthu ya nnyupa mwawe. ¹⁶ Otule aniiyaaye ntthuttu ahirutele onti yoori athuule juupa yawe. ¹⁷ Ootakhaliwa aakha apale anttelaaye

osikaniwa ari awiimitha ama eettaka waamwisa!
¹⁸ Mwinvekele Nluku yoori vitthu zaya epo ehirettikhane mwiita. ¹⁹ Maana, siikhu zaya epo ontela wiiyavo ohoowa ohineeyekevo thanku Nluku ompe olumwenku, na khunteela opuwa nkina nkhamo opo. ²⁰ Eriwaka Nluku khaafupheyisiye siikhu zaya epo, khaavo aari weettelaaye wiiya haayi, ila mwaasa wa apale awathawuliyeeyo, afupheyisa siikhu zaya epo. ²¹ Aphanu, amana ntthu awuuzani yoori: ‘Al-Masiihu otu ariiye apha!’ ama ‘Moone, otule ari okhule!’ mwihikhupali. ²² Maana anlawa apuwe Al-Masiihu oojipanka na manapiyu oojipanka anttelaaye othoonyeza alama na vitthu zootikinisa yoori kusapi awahi owaattettekha ananthawuliwa. ²³ Mweeyo mwiiyane phoole! Miiyo kiniwuuzani zooshi epo zihinarettikhane.

Ota wa mwaana wa pinaatamu

²⁴ Ila siikhu zaya epo, paata ya pala eto ya ohoowa, njuwa linttela oriipa na mweezi ontela oliikha waara. ²⁵ Matthottowa akhwe pinkuuni na kuvu ziriye pinkuuni zinttela osakhinyeya. ²⁶ Aphanu, mwinttela omoona Mwaana wa Pinaatamu mmawiku na owahi nwulweene na siifwa. ²⁷ Ye ontela oruma malayikha awe khwa phantte nne zooshi za nkerekhere wa olumwenku mpakha nkerekhere ya pinkuuni yoori awaakusanye ananthawuliwa awe.

Nsomo wa mfikeera

²⁸ “Mwijinozele nlikaniso wa nfikeera. Amana virapi zaya zinyoowela na mathapa khwaaza ophutuwela enthoonyeza yoori

mwiita ontta waattamela. ²⁹ Etthiipo theenya mweeyo, amana moona vitthu epo zeettaka orettikhana, mwijuwe yoori ye ori kharipu ya va milako. ³⁰ Miiyo kiniwuuzani khweele yoori khapila eti kinvira vitthu epi zihirettikhaneeni. ³¹ Pinku na vathi zooshi zinteela ovira, ila mattakhuzi aka khanviraru. ³² Ila monkoni wa siikhu ama wakathi khina anjuwaaye; wala malayikha pinkuuni wala Mwaana, woohiipi Paapa. ³³ Phoole, mwiiye woojeekesela, maana khamwinjuwa ofiya wa wakathi aya opo. ³⁴ Eri nkhamana ntthu anlikhaaye nyuupa yawe khuretta safwari ya peetiwenene; ila ahinalawe, khuwaalikhela ofwalume, akarumeya awe wakhula mmote sharuthi yawe, khunruma namweekesela yoori asale aweekeselaka. ³⁵ Tiito, mwijeekesele, maana mweeyo khamwinjuwa wakathi mweenyewe nyuupa anttelaaye oruti; enttela wiya njuwa looveva, osikhu layili, lifwajiri ama supu. ³⁶ Amana ye ata woohileezi, ti ahiwaasikane eettaka olala. ³⁷ Epile kiniwuuzaanini, kiniwuuzani mooshi: ‘Mwijeekesele!’ ”

14

Shawuri za omuula Yinsa

¹ Zaari osaleela siikhu piiri paasi yoori efiye siikhu ya Paashikowa na siikhu ya Njampo la Phaawu Zoohiina Fwaramento. Mahaakhimu a tiini na anamanozela a kano aari weekesa nanna ya onkhola Yinsa sirini yoori amuule. ² Yo aari olupa yoori: “Khanininkhola vanjampo yoori nihipuwise nzuuzu vakatthi wa atthu.”

Yinsa onvaaziwa mafuttha Betaaniya

³ Yinsa ari Betaaniya, eekhaliye vameeza owawe mwinyi mmote anitthiwaaye Simawu namaharaja, khutawo muukha aataniyeeyo suupha ya mafuttha oonukhela awaatta nzurukhu. Khupwecha suupha etile khumwiitthela Yinsa veeswa vawe. ⁴ Apale aari attaaphale khwiiya ookatipukha khusala oozana atthaaporu yoori: “Aharipwela-ni mafuttha apale. ⁵ Maana aari owahi wuuzanyisa miiya ttatthu za nzurukhu wa paratha, aari weettelaaye winkhiwa asikhini.” Yo khunshowera muukha otule. ⁶ Ila Yinsa khuwaalikhisa araka: “Mwinlikhe muukha otu khwa heeri, Mwanvelaveliselani? Ye akirettela miiyo etthu yooshapweya. ⁷ Maana asikhini mwina mweeyo mileele, na mwinwahi owaawuni mwitakharu. Ila miiyo akinteela wiiya vamote na mweeyo mileele. ⁸ Ye aretta etile awahiyeeyo. Avaaza mafuttha oonukhela mwiili aka raku zeene, atthenkezaka ozikhiwa waka. ⁹ Kiniwuuzani khweele yoori: wakhula vahali lintafusiriwaavo nttakhuzi la Nluku khwa olumwenku wooshi, epi arettiyeeyo muukha otu, zeettaka olupwiwa noofikhiriwa ye.”

Yuuda oninzinkula Yinsa

¹⁰ Aphano Yuuda Eshikariyoote, mmote wa apale khumi na awiri, khulawa wa mahaakhimu a tiini khwa shawuri za onzinkula Yinsa. ¹¹ Yo wakathi ansiliyeeyo khwiiya oofurahi na khumwaahiti Yuuda omwinkha nzurukhu. Khwa wakathi aya opo Yuuda aari weekesa kiphenyo saana yoori anzinkule.

Yinsa onja njampo la paashikowa

¹² Siikhu ya mwanzo ya Njampo la Phaawu Yoohiina Fwaramento, wakathi waazoweriweeyo orettiwa twaha pwittipwitthi yoojeliwa paashikowa, anakhiyoni a Yinsa khumuuzela yoori: “Ontakha yoori neette vayi nootthenkesele etthu yoojiwa ya paashikowa?”

¹³ Yinsa khuwaaruma anakhiyoni awe awiri khuwooza yoori: “Mwilawe mpakha ositati, ottuukho mwinlawa mwansikane mwinyi athuuliye yuuku ya maati. Mwinlotte othuuto,

¹⁴ mwimuuze mweenyewe nyuupa ethiito anttelaaye oviramo yoori ‘Mwaaliimu ontta wuuzela: Orivayi nsana aka wa omaka-vo, kinttelaaye onja-vo paashikowa na anakhiyoni aka?’

¹⁵ Aphano ye ontta wuunozani mweeyo khwa nyuupa ya vatulu nsana nwulweene na zooshi mwinihithajiyaaye. Mwitthenkeze attaapho njampo letthu.”

¹⁶ Anakhiyoni apale awiri khulawa mpakha ositati, khusikana zooshi nkham a etthiipile Yinsa aalupiyeezo na khuntthekeza paashikowa.

¹⁷ Wakathi oripiyeevo, Yinsa khuta na anakhiyoni awe apale khumi na awiri.

¹⁸ Ari vameeza eettaka oja Yinsa khuri: “Weekhweele kiniwuuzani yoori mmote wa mweeyo anjaaye na miiyo onkizinkula.”

¹⁹ Ooshi khwiiya oohuzunikha na khwaaza wuuzela wakhula mmote khwa zwaamu yawe yoori: “Talili khahiyo miiyo?”

²⁰ Yinsa khujipu yoori: “Mmote wa khumi na awiri anjanaaye miiyo parathu moote.

²¹ Mwaana wa Pinaatamu onlawa afwe, nkham a etthiipo yaatikhiweeyo monkoni wa ye. Ila wootakhaliwa ti otule

anttelaaye onzinkula Mwaana wa Pinaatamu! Afwataali ahivokoliweeni!”

Njampo la mwili na taamu ya Mbwana

²² Eettaka oja, Yinsa khuthuula phaawu, khuparikhiya, khumeya, khuwenkha anakhiyoni awe na khuwooza yoori: “Mwithuule; opu mwili aka.” ²³ Elottelanaka, khuthuula jikira, khushukhurwela, khuwenkha anakhiyoni awe na ooshi khunywa. ²⁴ Khuwooza yoori: “Eti ti taamu yaka ya wahati yitthiweeyo khwa zwaamu ya athu ooshi. ²⁵ Miiyo kiniwuuzani khweele yoori akinteela onywa theenya nshumo wa nrayi wa wuuva, mpakha siikhu kinttelaaye onywa theenya na mweeyo muufwalume wa Nluku.” ²⁶ Paata ya yo wiipa liipo, khulankha khusala alawa omwaako Oluveera.

Yinsa oninchimulela Pheeturu

²⁷ Aphanu Yinsa khuwooza yoori: “Mooshi mweeyo mwinlawa mwakanswi. Maana yaatikhiwa yoori: ‘Kininvulalisa nshuki aya, na pwittipwitthi zaya zinttela omwazeya.’ ²⁸ Ila paata ya osisimuwa waka, kinttela olokoza Kalileya.” ²⁹ Aphanu Pheeturu khutukhuru araka: “Hatha nkhamu ooshi eetta wuutthira, miiyo akinuutthira. ³⁰ Yinsa khunjipu yoori: “Weekhweele kiniwuuzi yoori leelo osikhu otthuupu, likukhuwi lihineekhe swaafu piiri, onteela okikhana swaafu ttatthu.” ³¹ Ila Pheeturu khusala akhanyarela channu araka: “Hatha nkhamu kintakha wuuliwa vamote na weeyo, akinteela wuukhana.” Ooshi khulupa etthiipo.

Yinsa nwoorotha wa Yetemaani

³² Aphano khulankha khulawa puuro eniitthiwaaye Yetemaani, khuwooza anakhiyoni awe yoori: “Mwiikhale apha, miiyo kinttela olompa.” ³³ Khunthuula Pheeturu, Tiyaaku na Yaahaya khwaaza oshukulikha, othunkuwikha na ohuzunikha. ³⁴ Yinsa khuwooza yoori: “Nafusi yaka ti ya ohuzunikha venkivene woosaleela ofwa; mwisale apha na mwijeekesele.” ³⁵ Yinsa khuwaasusa vattitthiiru khukokhora na khusala alompa yoori nkhamana enwaheya aattuwananisiwe wakathi opu wa ohoowa. ³⁶ Aari olupa toono: Oo Paapa zooshi khwa weeyo zinwaheya. Okaattuwananise miiyo jiikira eti ya ohoowa. Ila ehirettikhane khwa matakhello aka, ila khwa matakhello awo. ³⁷ Apho khurutela aphale aariivo anakhiyoni awe, khuwaasikana eettaka olala. Khumuza Pheeturu yoori: “Simawu, ontta olala? Khuwaheeni ojeekesela nenkawu wakathi mmote?” ³⁸ Mwijeekesele na mwilompe, yoori mwihikwele muuzayiniwa; rooho ti yookhomaala, ila mwili pi woottettheya.” ³⁹ Yinsa khuwaasusa opheya khusala alompa, arutelaka mattakhuzi mamoteru. ⁴⁰ Wakathi arutiyevo khuwaasikana eettaka olala theenya, mwaasa maasho aya eetta owaalemela; khaari ojuwa etthu yoojipu. ⁴¹ Khuta swaafu ya ttaatthu khuwooza yoori: “Nalelo mwintta olala na ovumula? Zafiyela! Wafiya wakathi wa Mwaana wa Pinaatamu winkheleliwa mmakhono wa anatwampi. ⁴² Mwilankhe, nilawe! Mwimoone namazinkula ori kharipu.

Ofukeliwa wa Yinsa

⁴³ Yinsa nalelo eettaka ottakhula, khusala ata Yuuda mmote wa anakhiyoni apale khumi na awiri. Aari ota na atthu awaatta athuuliye phanka na kolomontto, aarumiweeyo ti mahaakhimu a tiini, anamanozela a kano na attunkhulu a tiini. ⁴⁴ Namazinkula aawooziye alama araka: “Otule kinttelaaye ompatikha, ti othuuto; mwinkhole mwinthuule saana.” ⁴⁵ Wakathi afiyeeyo, ye khumwaattama khumuuzo yoori: “Mwaaliimu!” na khumpatikha. ⁴⁶ Atthu apale khunkhola Yinsa na khunkholelela. ⁴⁷ Aphano mmote wa anakhiyoni awe aariina kharipu, khufuttha phanka khunvavela khushija nshiilo la karumeya wa haakhimu nwulu wa tiini. ⁴⁸ Yinsa khuwoozza yoori: “Mwakiteela na phanka na mikokontto yoori mwikikhole nkhamantantarawu? ⁴⁹ Siikhu zooshi kaari vamote na mweeyo kisomisaka Nnyupa Woosifwiwamo, khuhikikholi; ila zooshi epi zaariye yoori emarisele zawaatikhiwa ti manapiyu. ⁵⁰ Anakhiyoni awe ooshi khumwanswi na khutthira. ⁵¹ Ila shapu mmote, aajifinikhiyeeyo nkhumu woolakala paasi aari onlottaaye Yinsa. Yo khunkhola, ⁵² ila khuvula nkhumu opule, khutthira waazu.

Yinsa vakatthi wa Mashawuriiya

⁵³ Khunthuula Yinsa khunlawana wa haakhimu nwulu wa tiini na khuthukumana mahaakhimu a tiini ooshi, attunkhulu a tiini na anamanozela a kano. ⁵⁴ Pheeturu khusala awaalotta ari peetiweene mpakha nlikokoro wa haakhimu nwulu wa tiini, na khulawa khwiikhala na anamarumeyela, ootthaka moottho. ⁵⁵ Mahaakhimu a tiini na Mashawuriiya ooshi

aari weekesa onsikanana Yinsa paathuli moote yoori anhukhumwele ofwa, ila khuhinsikanani hatha moote. ⁵⁶ Maana awaatta aari olawela oshaahiti woovonyeya khwa Yinsa, ila tukhuru zaya khazaari sawasawa. ⁵⁷ Aphano khulankha atthu akina na onlupeza vitthu zoovonyeya. ⁵⁸ “Fweeyo nansiila alupaka yoori: ‘Kimpwecha Nyuupa eti Yoosifwiwamo yoojekiwa pi makhono a anaatamu, na siikhu ttatthu kijeke kiina, yoohijekiwi pi makhono eenaatamu.’” ⁵⁹ Ila hatha nkhamu piitthiipo, mattakhuzi aya khaari wiiya sawasawa. ⁶⁰ Khulankha haakhimu nwulu wa tiini khumuuzela Yinsa yoori: “Khunjipu mattakhuzi apa onlokoveziwaaye?” ⁶¹ Ila Yinsa khwiiya woonyamala, kuhijipu hatha etthu. Haakhimu nwulu wa tiini khurutela omuuzela theenya yoori: “Weeyo o Al-Masiihu, mwaana wa Nluku Wooparikhiyiwa?” ⁶² Yinsa khujipu yoori: “Miiyo ki othuuto, na mwinlawa mwamoone Mwaana wa Pinaatamu eekhaliye nkono nlume wa Nluku wa owahi zooshi, na ataaka mmawiku a pinkuuni.” ⁶³ Aphano haakhimu nwulu wa tiini khuvarula kuwo zawe na khuri: “Khi ninrettanna oshaahiti nkina!” ⁶⁴ Mweeyo mwasiila okufuru wawe. Mwinuupuwela niini?” Atthu ooshi anri onsuhi wuuliwa. ⁶⁵ Aphano akina khwaaza ontthemela khunfinikha omaasho wawe khusala ampwakula na amuuzela yoori: “Ti paani oopiyeeyo? Onlupe!” Anamweekesela khunkhola na khumpwakula.

Pheeturu oninkhana Yinsa

⁶⁶ Pheeturu aarettiye ari vathi nlikokoro wa nyuupa etile wakathi atiyeeyo njaazi wa

haakhimu nwulu wa tiini. ⁶⁷ Amooniyeevo Pheeturu eettaka wootha moottho khuri: “Weeyo waari na Yinsa wa Nazareeti.” ⁶⁸ Ila Pheeturu khukhana araka: “Akininjuwa, na wala akinsiila etthu onlupaaye.” Khusaruwela nlako wa nlikokoro. ⁶⁹ Wakathi njaazi otule amooniyeevo theenya, khuwooza apale aariina attaaphale yoori: “Otu mmote wa atthaapo.” ⁷⁰ Ila khukhana theenya. Oviriyeevo wakathi vattitthiiru, apale aariina atthaapale theenya khumuuzza Pheeturu yoori: “Weekhweele, weeyo o mmoteru na atthaapo, maana onkalileya. ⁷¹ Ye khwaaza onlaani na olapha yoori: “Akininjuwa pinaatamu aya oto oninlupaaye.” ⁷² Nasaapiru likukhuwi khwiikha swaafu ya phiiri. Pheeturu khuupuwela mattakhuzi Yinsa amuuziyeevo yoori: “Likukhuwi lihineekhe swaafu piiri, onikikhana swaafu ttatthu.” Khulaavo aphale vava khusala alila.

15

Yinsa ari wa Pilaatu

¹ Supuyeene, khukusanyeya Mahaakhimu a tiini, attunkhulu a tiini, anamanozela a kano na Mashawuriiya ooshi, khunfuka Yinsa khunthuula khumwinkha Pilaatu. ² Pilaatu khumuuzela yoori: “Weeyo o mfwalume wa mayaahuuti?” Ye khujipu yoori: “Weeyo ti onlupaaye.” ³ Mahaakhimu a tiini khunlokoveza vitthu zawaatta Yinsa. ⁴ Pilaatu khurutela omuuzela theenya yoori: “Weeyo khunjipu? Nkoona vitthu kavi anuulokovezaaye.” ⁵ Ila

Yinsa kuhijipu hatha etthu Pilaatu khwiiya wooshanka.

Yinsa ahukhumweliwa ofwa

⁶ Yaari zowera yaya, wakathi wa Njampo la Paashikowa, Pilaatu onfukulela napherezu mmote, otule aari ovekiwaaye ti atthu. ⁷ Mwinyi mmote anitthiwaaye Baraba aafukeliwe vamote na anamakhijili mwaasa wa omuula ntthu wakathi wa nzuzu. ⁸ Khuntti ya atthu etile khuta na khunvekela Pilaatu yoori arette etile awaazoweziyeeyo owaarettela. ⁹ Aphano Pilaatu khuwoozela yoori “Mweeyo mwintakha yoori kinfukulele mfwalume wa mayaahuuti?” ¹⁰ Maana ye aari ojuwa saaneene, yoori mahaakhimu a tiini anleviye Yinsa mwaasa wa nrima. ¹¹ Ila mahaakhimu a tiini awaakhanyareliye atthu apale yoori anvekele Pilaatu aaze onfukulela Baraba khwa otakha waya. ¹² Pilaatu khuwoozela theenya yoori: “Kinrettele niini mwinyi otu mweeyo mwinimwiitthaaye mfwalume wa mayaahuuti?” ¹³ Yo khunyakula araka: “Akhomeliwe!” ¹⁴ Ila Pilaatu khuwoozela yoori: “Niini arettiyeeyo yootakhala?” Ila yo khusala atepa onyakula araka: “Akhomeliwe!” ¹⁵ Pilaatu eekesaka otuvelisa khuntti etile ya atthu, khunfukulela Baraba na khuruma ojaphiwa Yinsa na olawa okhomeliwa.

Anajanka aninveyisa Yinsa

¹⁶ Anajanka khunthuula Yinsa, khunlawana nlikokoro wa nyuupa khuulu ya nsatoro khukusanya khuntti khuluyeene ya anajanka.

17 Khunwalisa juupa yookhuttuwa, khuvaasha khaara ya miiwa khunwalisa mmwishwa.
 18 Khusala anchelisa araka: “Wiiye haayi, mfwalume wa mayaahuuti!” 19 Khusala ampiya veeshwa vawe na nthala na ontthemela, akokhoraka na omwaaputu.

Okhomeliwa wa Yinsa

20 Paata ya ontukhana, anajanka apale khunvula kuwo yookhuttuwa khunwalisa kuwo za wiiya zawe. Aphano khunsarulela vaje yoori alawe ankhomele. 21 Khukutthanana mwinyi mmote wa Sireene aari wiitthiwaaye Simawu, papaawe Alishantere na Ruufu, aari olankhaaye omashapa. Khunkhanyarela othuula nsalapa wa Yinsa. 22 Yo khunthuula Yinsa khunlawana puuro eniitthiwaaye Kolokoota, eriina maana a puuro ya likurakuza la eeshwa. 23 Khusala atakha omwinkha viinyu yoophakanyaniwa mafuttha oonukhela, ila ye kuhinywi.
 24 Aphano khunkhomela na khwaawanyana kuwo zawe khwa weekesa nasipu yoori ajuwe wakhula nthu phantte ari weettelaaye osalana.
 25 Aakhomelaniwe wakathi wa saa-ttaatthu, supu.
 26 Pi etthiipo yaatikhiweeyo khwa olokoveziwa wawe yoori: MFWALUME WA MAYAAHUUTI.
 27 Vamote na ye aakhomeliwe manantarawu awiri, mmote nkhone nlume, nkina nkhone nkha, 28 [na khurettikhana epile zawaatikhiwa zaalupiyeeyo yoori: “Ye aatthanttiwe nkhamana namatapanya.”]

29 Apale aari oviraaye attaaphale, eetta ontukhana na osakhinya viishwa zaya

araka: “Haya, weeyo ompwechaaye Nyuupa Yoosifwiwamo, khwa siikhu ttatthu khujeka. ³⁰ Wiishukhe vansalapa apho na ojuusuru omweenyewe!” ³¹ Khwa nanna etthiipile, mahaakhimu a tiini na anamanozela a kano khusala alupa atthaaporu anveyisa yoori: “Awoosuru akina, ila khanwahi ojuusuru mweenyewe. ³² Wiishukhe vansalapa apho O Al-Masiihu, mfwalume wa Ezirayiilu, wiishukhe yoori niwoone na nuukhupali.” Apale aakhomeliweeyo, na yo eetta ontukhana theenya.

Ofwa wa Yinsa

³³ Yaapuwiye yiiza olumwenku wooshi, waaza atuhuri mpakha alaasiri. ³⁴ Payina ya alaasiri, Yinsa khukhuwa na huula ya onyakula, araka: “Elooyi, Elooyi, Lama sabatani?” Eto ena maana ya “Nluku aka, Nluku aka, mwaasa aya niini okanswaka? ³⁵ Wakathi atthu apale aari attaaphale asiiliyeevo mattakhuzi apale, khulupa yoori: “Mwisiile, oninkhuwela Aliyaasi!” ³⁶ Mmote aari attaaphale khutthira khulawa khunaanisa shiponja na vinaakiri, khupweha va muutthi na khumwinkha Yinsa yoori anywe na khuri: “Mwinlikhe, nimoone nkhamama Aliyaasi onta anlazevo aphale vaya. ³⁷ Ila Yinsa khunyakula channu khwittha phuumu. ³⁸ Phazira ya Nnyupa Woosifwiwamo khuvaruwa khwaawanyeya phantte piiri, waaza vatulu mpakha vathi. ³⁹ Wakathi namalokozela wa anajanka aariye omaasho wa Yinsa, ooniyeevo

nanna afwiyeeyo, khuri: “Wekhweele mwinyi otu aari Mwaana wa Nluku!”

⁴⁰ Aakha akina aari oretta eettaka woona vitthu epile zaari orettikhanaaye ari peetiwene. Khwa atthaapo aarivo Mariyamu Mataleena, Mariyamu mamaawe Tiyaaku, nsimaana wa Yuusufu, na Salome. ⁴¹ Aakha aya apo amperekhiye Yinsa na omwaawuni wakathi ariiyo Kalileya. Owaalikha apo aya, aarivo aakha akina awaatta aalawaniyeeyo Yeruzaleemu.

Ozikhiwa wa Yinsa

⁴² Njuwa leettelaka otupweela, mwaasa wa wiiya siikhu ya otthenkeza Saapatu, ⁴³ Yuusufu wa Arimateeya, mwinyi wa fwayita na aari oretta phantte ya Mashawuriya, oto naye aari oweja ota wa ofwalume wa Nluku, khulawa woominyalavo wa Pilaatu na khuveka mwiili wa Yinsa. ⁴⁴ Pilaatu khwiiya wooshanka noosiila yoori Yinsa afwa. Khunkhuwela namalokozela wa anajanka khumuuzela nkhamama Yinsa afwa. ⁴⁵ Wakathi ooziweevo ti namalokozela wa anajanka, khumwinkha mwiili wa Yinsa Yuusufu. ⁴⁶ Aphano Yuusufu khuuzanya kuwo yoolakala yoopepheya, khwiishusha mwiili wa Yinsa vansalapa aphale, khumputaputela va kuwo etile yoolakala na khunttha nkhapuri yaathipiweeyo va mwaako. Nawiisha, khutthaavo liwe vanlako vaya. ⁴⁷ Mariyamu Mataleena na Mariyamu mamaawe Yuusufu, aarettiye eettaka woona na khoona mwiili wa Yinsa vahali waatthiweevo.

16

Osisimuwa wa Yinsa

¹ Paata ya ovirisa Saapatu, Mariyamu Mataleena, Salome na Mariyamu mamaawe Tiyaaku, khuuzanya mafuttha oonukhela yoori eettehele mwiili wa Yinsa. ² Siikhu ya mwanzo ya sumana supuyeene, njuwa leettelaka opuwa, aakha apale khulawa okhapuri. ³ Ntarikhi khusala oozelana yoori: “Paani anttelaaye onilazelavo liwe lifukaniweeyo nlako wa khapuri?” ⁴ Maana liwe laya laari liwululene. Ila noofiya okhule, khoona liri loolaziwavo. ⁵ Aviriyeevo nkhapuri mphule, khumoonna shaapu awaliye kuwo zoolakala eekhaliye nkhoona nlume, na khwiiya awoova. ⁶ Khuwooza yoori: “Mwihooove, mweeyo mwinimweekesa Yinsa wa Nazareeti, aakhomeliweeyo. Ye asisimuwa! Khaamo mphu, moone puuro aattattikheliwevo. ⁷ Mwilawe na mwawooze anakhiyoni awe na Pheeturu yoori: ‘Ye alokoza eettaka Kalileya.’ Ottuukho mweeyo mwinlawa mwamoone, nkhamama etthiipo awuuziyeenini.” ⁸ Eettaka othukumela na osuthuwa, aakha apale khulaawo na khutthiramu nkhapuri mphule. Na khuhimuuzi hatha ntthu, maana aari awoova.

Yinsa onimpuwelela Mariyamu Mataleena

⁹ Wakathi Yinsa asisimuwiyevo lifwajiri la siikhu ya mwanzo ya sumana, khumpuwelela omwanzo ene Mariyamu Mataleena, otule eekariweeyo mmwiili mwawe masheethwani sapa. ¹⁰ Ye khulawa owooza ashirikha awe Yinsa, maana yo aari oohuzunikha na olila. ¹¹ Wakathi asiiliyevo yoori Yinsa ori haayi na ampuweleliye Mariyamu Mataleena yo khuhikhupali.

Yinsa oniwaapuwelela anakhiyoni awiri

¹² Paata ya vitthu epile, Yinsa khujithoonyeza khwa wuuso nkina vakatthi wa anakhiyoni awe awiri alottaka tarikhi ya omashapa. ¹³ Yo khuruti khuta khuwooza mattakhuzi apale azaaya; ila theenya apale khuhikhupali. ¹⁴ Omwiisho waya Yinsa khuwaapuwelela apale khumi na mmote, wakathi aariyo vameeza, na khuwaashowera mwaasa woohikhupali na wuuma rooho zaya, maana khawaasileziye apale aamoniyeeyo wakathi asisimuwiyevo. ¹⁵ Khuwooza yoori: “Mwilawe olumwenku wooshi mwawalaleyele atthu ooshi hapari zooshapweya. ¹⁶ Otule ankhupalelaaye na khoosiwa ontta wuusurukha, ila otule ahinkhupalelaaye oniiyana paathuli. ¹⁷ Alama epi enttela owaalokoza apale anikikhupalaaye miiyo: khwa nzina laka aniikara masheethwani, anlawa attackhule luuka pheeya, ¹⁸ ankhola nyookha na onywa amali ya wuula, ila khuhiwaaretti hatha etthu na owaattheela atthu makhono khuvona.”

Yinsa oneetta pinkuuni

¹⁹ Paata ya owooza mattakhuzi apale, Mbwana Yinsa khuweziwa pinkuuni khwiikhala nkhono nlume wa Nluku. ²⁰ Aphano anakhiyoni apale khulankha khulawa olaleya phantte zooshi, Mbwana aari owaawuni ahakikhaka mattakhuzi aya na alama zaari owaalottaaye.

**Kote New Testament
Portions of the Holy Bible in the Kote Language of
Mozambique**

Porções da Bíblia Sagrada no Kote Língua Moçambique
copyright © 2005-2008 Wycliffe Bible Translators, Inc.

Language: Kote

Translation by: Wycliffe Bible Translators

O utilizador pode copiar e distribuir a obra.

You may copy and distribute the work.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-30

PDF generated using Haiola and XeLaTeX on 11 Nov 2022 from source files dated 9 Oct 2020

7eacf624-a9f0-59bc-b7bf-b6190a381fc4